

Asun Wankláán Aní Marko Lówanlín

Asú Ɖbɔpú Yohane Bulu Asún Ɖkanda

(Mateo 3:1-12; Luka 3:1-18; Yohane 1:19-28)

¹ Alí Bulu mu Bi Yesu Kristo iwɔ asun wankláán ámu ilotsuá asɔ ní. ² Ileba mótó fé aliá Bulu ɔnósú ɔɔɔpú Yesaia lówanlín wá mu ɔwulótó ɔbéɛ,
“Kɪ, nde obi wa gya fu nkpa.

Mu ɔbéla ɔkpa há fú ní.

³ Ɖku dékplɔn dimbísú ɔbéɛ,

‘Mɪla anɪ Wíe ɔkpa.

Mɪtswii ikpa ha mu!’ ”

⁴ Asú Ɖbɔpú Yohane léba ɔde ahá asú bɔ, ɔde Bulu asún ɔkan da Yudea dimbísú ɔbéɛ, “Mɪdamli klɔntɔ, amlisi lakpan bwe. Bulu osikie mɪ, ambɔ mɪ asú.” ⁵ Ahá botsu Yerusalem wúlutɔ pú Yudea ɔmátó féé bá mu wá. Bele amó lakpan blí, ɔlɔbɔ amó asú Yordan ntsutso.

⁶ Yohane lówa kpósó-imi atadiɛ, ɔbɔpu ɔwulókpa kpa kpa ɔfé klí mósú. Atsantsanku pú ɔkwén otegyi.

⁷ Oletsia dá asún ɔkan, blí ɔbéɛ, “Ɖkú ɔɔɔn mɪ bu ɔma ɔbá. Mmɔɔɔn aní nógyonká sánkí mu ntɔkɔta ɔfé kóráá. ⁸ Mí mú á, ntsu ndepɔbɔ mɪ asú, táme mu mó ɔbɔpu Ɖɛ Wankíhé bó mɪ asú.”

Yesu Asúɔ Pú Mu Isóki

(Mateo 3:13-4:11; Luka 3:21-22; 4:1-13)

⁹ Nke ámutɔ á, Yesu lótsu Nasaret, wúlúá ɔbu Galilea ɔmátó ba Yohane wá, Yohane lóɔ mu asú Yordan ntsutso. ¹⁰ Yesu lénya dáli ntsu ámutɔ ali,

olowun nwolótáa lefinkí, Ɖɛ Wankíhé dékplí dali mótó fé abróduma, lobogyonká muṣu. ¹¹ Inu ɔme ku lótsu ɔsósó ɔbéé, “Fúgyí mí bíá ntɔdwé, mi ansí tehié gyí fú iwí ní.”

¹² Inuṣu Ɖɛ Wankíhé amu lékpa Yesu ya dimbísó.

¹³ Oletsíá inu nke aduana, Satan létsíá bɔsɔ mu kl. Mba pututɔ-mbwí létsíá, Bulu-abɔpu beba beki muṣu.

Yesu Gyumagyihe Asitsua

(Mateo 4:12-22; Luka 4:14-15; 5:1-11)

¹⁴ Bekítá Yohane tswí obu ɔma a, Yesu lóyɔ Galilea ɔmátó, ɔde Bulu asun wankláán ámu ɔkan da. ¹⁵ Ɖbéé, “Bré ámu lafun. Bulu iwíegyi ámu lawié wóyí tá. Mhídamli klontɔ ba Bulu wá, amlíhɔ mu asun wankláán ámuṣu gyi.”

¹⁶ Eke ɔku Yesu ná Galilea ɔpu ɔnó, olowun Simon mba mu gyama Andrea. Bude asawu tswí, tsífé aye alepó bugyi. ¹⁷ Múú ɔlebláa amú ɔbéé, “Mlɔba bobuo mi. Nóbwe mlí anyánkprósa alepó.” ¹⁸ Inuṣu besi amú asawu aná tswí, kplá buo mu.

¹⁹ Ɖlenatí yó nkpá kpalobí á, olowun Sebedeo abí, Yakobo mba mu gyama Yohane é. Bubu ɔklontɔ, bude amú asawu bín. ²⁰ Inuṣu Yesu létí amú é, benatí sí amú sí mba mu apafɔ wá ɔklon amotɔ ba bobuo mu.

Yesu Ɖɛ Laláhe Gyáa

(Luka 4:31-37)

²¹ Yesu mba mu akasípó bɔyɔ Kapernaum wúlutɔ. Ɖlɔyɔ Yudafo ofiakpa yósuná ató ɔkpónú ɔdaké.

²² Mu atosunáhé lobwie amú ɔnó, tsífé olosuná amú ató túmísu. Megyi fé Mose mbla asunápó amu.

²³ Oyin ḡku léba ofiakpa inu, ḡḡe laláḡe bu muṣu.
²⁴ Ɖlɔkplón blí ḡbée, “Yesu Nasaretyin, amansu búu ania funyḡ nsiné? Aní ḡḡkpa febá lóó? Nyin ḡhá oduá fuyi. Fúgyí Bulu Ɖha Wankíhé amu ni!”

²⁵ Yesu lókplon wa ḡḡé ámu ḡbée, “Kpa ḡnó bun, afodalí mutá.”

²⁶ Inu ḡḡe laláḡe amu lówusúu oyin ámu ḡwunlínso, sórá okitikíti kúklókúú, dáli mutá. ²⁷ Ɖnó lobwie amú fée, befité aba be, “Ntḡ ofúla ni? Iní mú á, atosunáḡe pḡpwe ni. Oyin ánfí bu túmi, ḡḡkplón wa ḡḡe laláḡe, itobú mu.”

²⁸ Iní su Yesu idá leklei wá Galilea ḡmá ámutá fée.

Alḡv Tsatsḡatsḡ Tsa

(Mateo 8:14-17; Luka 4:38-41)

²⁹ Yesu muva mu akasípó benya dáli Yudafḡ ofiakpa inu alí, bḡḡo Simon muva Andrea wóyító. Yakobo muva Yohane é bubu amútó. ³⁰ Bḡḡo á, owísó lakítá Simon mu sia tshé, ḡda. Inunu bebláa Yesu ḡṣi ámu iwí asún. ³¹ Múú ḡḡḡo yékítá ḡṣi ámu ibí, tsú mu kúsú. Inunu owísó ámu lókusú muṣu, ḡḡbwe amú afḡḡo.

³² Mú ntḡpwe fḡḡn a, bḡḡv alḡv pḡ ahá aní ḡḡe laláḡe de amú háan fée ba Yesu. ³³ Wúlu amu fée beba befia wóyí ámu ḡnó. ³⁴ Yesu létsa ahá tsatsḡatsḡá bude ilo ḡtsan-ḡtsan lḡ, olegya ḡḡe laláḡe tsatsḡatsḡo é lé ahátḡ. Ɖmeḡa ḡḡe laláḡe amu abutḡi, tsúfé amú fée buyin mu.

Bulu Asón Ɖkanda Galilea Ɖmát

(Luka 4:42-44)

³⁵ Mú ḡyi keḡe bake a, Yesu lédali wúlu amutḡo ḡo itsétó ḡde mpái bḡ. ³⁶ Táme Simon muva mu aba bḡḡo mbódí dúnká mu alí yówun mu. ³⁷ Bréá bowun mu a, bebláa mu be, “Ahá fée bude fú dunká.”

38 Múú Yesu lébláa amú òbée “Mliha ayò awúlu bámbású, anyeda Bulu asón ámu òkan inu é, tsúfè ìní sù neba ní.”

39 Inu òlòyò yéki Galilea òmátó fée, òde asón ámu òkan da Yudafò ofiakpa fée, òde òje laláhe é gyáa le ahátò.

Ilò Pèpè Òlòpú Òkò Tsa
(Mateo 8:1-4; Luka 5:12-16)

40 Ilò pèpè òlòpú òkò léba bèda akpawunu Yesu ayabítò, kókóli mu òbée, “Owíé! Ní fòtsulá á, fétalí há mí iwí bèplí.”

41 Mu asón lówa Yesu nwé. Mú sù òletinkí ìbì da mu, bláa mu òbée, “Natsúlá, fò iwí iplí!” 42 Inunú ilò pèpè amú ìlèta, mu iwí léplí. 43-44 Múú Yesu léda mu òlá òbée, “Mábla òhaa asón ánfí. Natí laa afòpú fò iwí yosuná Bulu igyí òhapú, afòha mu iwígyòráto amúú Mose mbla lósuná tsú ilò pèpètsa iwí ámu. Igyi adánsíe suna ahá ání fò iwí laplí.”

45 Táme oyin ámu lénya dáli inu alí, òlòwa mú òkan da bí. Òlèda asón ámu òkan wúlu amúto fée fiá. Mú sù Yesu métra talí lé iwí òwan wíé wúlu kòkòtò, itsétó òletsiá tsíá. Táme mú ó á, ahá betsiá tsú ntíné-ntíné ba mu wá.

2

Tsukòlè Osínpu Tsa
(Mateo 9:1-8; Luka 5:17-26)

1 Nke kpalóbí kù òma a, Yesu léyinkí yó Kaper-naum wúlutò. Ahá bonu ání alaba wóyí. 2 Mú sù ahá tsòtsòtso bèba bəbəlá wóyí ámu. Òkpa kóráá itráa ma inová fòtsun wie mútú. Yesu léda Bulu asón ámu òkan súná amú. 3 Ahá abaná bəsvərá tsukòlè osínpu òkò akpasu ba mu. 4 Òdəm amú sù bumenya

akpa pú mu wíe Yesu wá. Iní su bɔyódu obu ámu awunso, dá mú otineku tíí, beklíá akpa amu tsun obó ámutɔ, pú mu tswi Yesu ansító. ⁵ Bréá Yesu lówun ání bahɔ mu gyi a, ɔlebláa tsukule osínpu amu obée, “Mí bí, nasí fú lakpan kíe fú.”

⁶ Inu Mose mbla asunápu akvá botsie inu, beblí wá nwuntɔ bee, ⁷ “Ntɔ asón oyin ánfí déblí alí? Megyí mbusuo álabó á? Ma é obétalí sí lakpan kíe ahá dun Bulu nkule?”

⁸ Yesu lébi ání buɔe nwéen gyí amú nwuntɔ. Mú su ɔlefíté amú obée, “Ntogyi sù mlíde ínì odu gywín?”

⁹ Mɔmu bówa ablíle ání nébláa tsukule osínpu anfi? ‘Nasí fú lakpan kíe fú’ ntée ‘Kusu tsu fú akpa afonati?’

¹⁰ Táme ndekléá mlíbú ání mí, Nyankpusa-Mu-Bi ánfí mbu túmí ɔyí ánfítɔ sí ahá lakpan kíe amú.” Inu ɔlebláa tsukule osínpu amu obée, ¹¹ “Nde fú bláa mbée, kusu! Tsu fú akpa afonati yɔ wóyító!”

¹² Inuɔɔɔɔ ɔɔkusu, tsú mu akpa, náti amú ansító inu. Iní lówa amú fée wánwan, bekanfú Bulu blí bee, “Anímókówun ofúla anfi odu kí.”

Lewi Tí

(Mateo 9:9-13; Luka 5:27-32)

¹³ Yesu létrá yɔ Galilea ɔpu ɔnó. Ɔɔm kpɔnkpɔnkpɔnti beba mu wá, olosuná amú ató.

¹⁴ Bréá ɔɔpu ɔyó á, olowun Alfeo mu bi Lewi tsie mu lampóo ɔhákpa. Múú ɔlebláa mu obée, “Bobuo mi.” Inuɔ ɔɔkusu buo mu.

¹⁵ Mú ɔma a, Lewi léti Yesu mva mu akasípu ató ogyíkpá mu wóyító. Lampóo ahópu pú lakpan abwepú tsɔtsɔtsɔ é bobuo mu ba ató ámu ogyíkpá.

¹⁶ Bréá Mose mbla asunápu amutɔ akvá bugyi Farisifɔ bowun ání Yesu mva lakpan abwepú pú lampóo ahópu buɔe ató gyí a, befité mu akasípu bee,

“Ntogyi sù mwa lakpan abwepù pù lampóo ahópu bude ibi wa gyi ató?”

¹⁷ Yesu lónu asún ánfí, òlebláa amó òbée, “Alópu léhián ìlò òtsapó, megyí ahá ání iwí bu amó ònlín. Mmèba aha wankláán òtikpá, mbóún lakpan abwepù òtikpá neba.”

*Ọ̀nókí Iwí Asun Fítéhé
(Mateo 9:14-17; Luka 5:33-39)*

¹⁸ Asú Ọ̀bọ̀pù Yohane akasípù pù Farisifò butetsiá kí ọ̀nó. Èké òkò akò bẹba bẹfité Yesu bẹẹ, “Ntogyi sù Yohane akasípù pù Farisifò akasípù butekí ọ̀nó, táme fù akasípù mú butamakí ọ̀nó?”

¹⁹ Yesu léle mú ọ̀nó òbée, “Ní ọ̀tsí ọ̀kpáínpù bu mu anyawíe wá á, békí ọ̀nó? Èkẹkẹkẹ! Ìniá ọ̀bò amó wá ánfí mú á, bóméekí ọ̀nó. ²⁰ Táme èké kò bẹba ání békpa ọ̀ká ọ̀tsiápu amu náti sí amó. Alí nkẹ ámutò békí ọ̀nó ní.

²¹ “Ọ̀haa tamapó tati pọ̀pwe tan tati dada. Tsúfẹ tati pọ̀pwe amu békpikpí tsií dáda amu ikò lé, há ọ̀tánkpa ìnu bẹlatéi tsía. ²² Alí kén butamapó nta pọ̀pwe wá ọ̀wulú-kpákpá kente wuhétó ní. Nta pọ̀pwe amu ibófu fá kente amu tsítsá, yíntá kente amu é. Ìni sù ọ̀wulú-kpákpá kente pọ̀pwetò bótọ̀pù nta pọ̀pwe wá.”

*Ọ̀kpónú Ọ̀daké Mv Wie
(Mateo 12:1-8; Luka 6:1-5)*

²³ Yesu mwa mu akasípù bọ̀tsun ayó ndò kùtò ọ̀kpónú ọ̀daké, mu akasípù bọ̀púsáa ayó ámu kò wí.

²⁴ Farisifò akò bowun amó, bẹfité Yesu bẹẹ, “Kí, ntogyi sù bude tóá aní mbla mèha ọ̀kpa bwe ọ̀kpónú ọ̀daké?”

²⁵ Yesu léfité amó òbée, “Mlímókókla nu tóá Owíe Dawid lóbwe bréá akón de mwa mu abúopu, buma

tatáá bégyi kí? ²⁶ Olebitíwíé Bulu osúmƙpa yótsu bodobodoá bapóhá Bulu igyí ba, mva mu abúopu amv begyi, Bulu igyí ðhapú ðehen Abiata bísú. Bulu igyí ahapú nkule beɛ ɔƙpa bútegyi aɩ bodobodo amv.”

²⁷ Mú ɔɛtrá bláa amú ɔbéɛ, “Nyankpusa sú Bulu lóbwɛ ɔƙpónú ɔdaké ámu. Megyí ɔƙpónú ɔdaké ámu sú Bulu lóbwɛ nyankpusa. ²⁸ Mú su mí, Nyankpusa-Mu-Bi ánfɩ gyí ɔƙpónú ɔdaké mu wie!”

3

Ɔɔtsa Ɔƙpónú Ɔdaké

(Mateo 12:9-14; Luka 6:6-11)

¹ Yesu létrá yɔ YudaƔɔ ofiakpa ɩnv á, oyin ɔƙu tsie ɩnv, mu ɩbi ƙule lawú. ² Aha akv buɛ Yesu téɛ, abuki beɛ ɔbétsa mu ɩɔ ɔƙpónú ɔdaké ámu, ménɩ bénya mu ɩwi asón blí. ³ Yesu lébláa oyin ámúú mu ɩbi ƙule lawú ámu ɔbéɛ, “Kusu belí amú ansító nfi.” ⁴ Mú ɔɛfité amú ɔbéɛ, “Ntɔ anɩ mbɩla léha ɔƙpa ání abwéɛ ɔƙpónú ɔdaké? Yilé lóó, ntéɛ lalahɛ. Aháɔ ðha nkpa lóó, ntéɛ amóɔ mu?”

Táme ðhaa méɛ mú ɔnó. ⁵ Yesu lópv ɔbló ƙɩ amú bómlí. Ɔbɔ mu ɔsin, tsúfé ƙɩntɔ bu amú odwin. Mú ɔɛɛbláa oyin ámu ɔbéɛ, “Tɩnkɩ fú ɩbi amv.” Olenya tɩnkí mú aɩ pé, ɔhé lowie mútó. ⁶ Farisifɔ ámu beɛɔaɩ yɔ, amúa Owíe Herode ahá beƙítá agywɩn ɩnv aɩá bóbwɛ bómu Yesu.

Ahá Tsɔtsɔtsɔ Ɔb Tsɔ

⁷⁻⁸ Yesu mva mu akasípú benatí bɔyó Galilea ɔpv ɔnó. Ɔɔɔm ƙpɔnkpɔnkpɔntɩ bobuo mu tsú Galilea móa Yudea ɔmátó, Yerusalem, Idumea, Yordan buƙƙpa ɔbɩn pú Tiro móa Sidon nsáɩntɔ ba mu wá. ⁹ Ahá ámu bɔɔubi. Mú su ɔɛɛbláa mu akasípú ɔbéɛ,

budúnka òklun kv yai ha mu, ménì bómóoputá mu. ¹⁰ Tsúfè alatsá ahá tsòtsòtsò ìlò. Mú sù alòpù amòtò okugyíòkv dékléá òbòpù ibi da mu. ¹¹ Ní ahá ání òhè laláhe bù amósó benyá wun mu ali á, badida mu ayabiasì, sùrá okitikítì blí bèè, “Fógyí Bulu mu Bi ámu ní!”

¹² Támè àleda òhè laláhe amu òlá kínkíínkín òbèè, imáha ahá abòbì mu.

Akasípó Amu Adá

(Mateo 10:1-4; Luka 6:12-16)

¹³ Yesu lódu yó busu, òletì ahá ání mu onutó odeklé, báyòtu mu. ¹⁴⁻¹⁵ Mú òlèè amótó ahá dúanyò, òletì amó mu sumbí ayòpò ání muà amónyò bétsiá, otsia wa amó abuyeda mu asón òkan, abugya òhè laláhe lé ahátò.

¹⁶ Ahá dúanyò ámu adá gyí, Simon ání òledínká mu Petro; ¹⁷ Sebedeo abí Yakobo muà mu pio Yohane (òledínká amó adá òbèè, “Boanerges.” Mú asì gyí, “Òpráda abí.”); ¹⁸ Atráhe gyí, Andrea, Filipino, Bartolomeo, Mateo, Toma, Alfeo mu bi Yakobo, Tadeo muà Simon ání ogyi iwisutsiá adunkápó òpasuatò òha; ¹⁹ pù Yuda Iskariot ání òlèbèè mu há.

Yesu Muà Beelsebul

(Mateo 12:22-32; Luka 11:14-23; 12:10)

²⁰ Bréá Yesu lóyò wóyító à, òdòm bètrá ba mu. Muà mu akasípó bumenyá òkpa ání bégýì ató kóràá. ²¹ Bréá mu wóyító ahá bonu mu iwì asón á, báyò bèyékpa mu, tsúfè bókì bèè mu nwun layíntá.

²² Mose mbla asunápó akvá botsu Yerusalem ba mu beblí bèè, “Òhè laláhe owíè Beelsebul tsíè muòtò. Mu túmì òdepuhya òhè laláhe lé ahátò.”

²³ Mú su Yesu létí amó ba mu iwí wá, òlebláa amó asón ayébitò òbée, “Nkálí Òbunsám òbétalí gya mu iwí? ²⁴ Iwíe ogyíkpa ání ilaye anyò, bude aba kò ibédida. ²⁵ Wóyí oduá mótó atsiápú bude aba kò é itobwíé. ²⁶ Mú su ní Òbunsám dé mu iwí gyáa a, òméetalí líí. Mu ònó òmòkpa ní.

²⁷ “Òhaa méetalí wíé òwònlínprò wóyító yókulá mu ató, nkétí alagyankpa kíklí mu tswí, asa òbétalí kólá mu ató fée.

²⁸ “Ònòkwali nde mlí bláa mbée, Bulu òbétalí sí lakpan pò abususu kugyíku kíé nyankpòsa. ²⁹ Táme ní òku òblí abususu Òje Wankíhé amu iwí á, Bulu méesikíé mu ekekéke, tsúfé alabwé lakpan ání sikíé ma mú iwí.” ³⁰ Aha aku beblí bée, òje laláhe bó Yesutò. Mú su òde ínì blí ní.

Yesu Abusuanfò Onutó

(Mateo 12:46-50; Luka 8:19-21)

³¹ Yesu mu yin muva mu apio beba belí kpankpa, bowa òku bée, òtí mu ha amó. ³² Òdòm butsie bomlí mu, bebláa mu bée, “Fú yín muva fú apíó bulí kpankpa, bude fú dunká.”

³³ Mú Yesu léfité amó òbée, “Amendí gyí mí yín muva mí apíó?” ³⁴ Mú òleki ahá á mú butsie bomlí mu amu, blí òbée, “Mlíki, mí yín muva mí apíó gyí ahá ánfí á! ³⁵ Òhagyíòha ání òtòbwé Bulu apé a, mu gyí mí pío pò mí yín ní.”

4

Ató-abi Owunyápu Iwí Yébi

(Mateo 13:1-9; Luka 8:4-8)

¹ Yesu létrá kúsú yó òde ató suná Galilea òpu ònó eke òku. Òdòm amu bobomlí mu. Mú su òòdu wíé

oklontə, yétsiá ɔpu amusu, ahá ámu é bulí ɔpu ɔnó inu. ² Inu olosuná amú ató tsətsəɔtsə ayébitə ɔbéé,

³ “Mlinu! Ɔɔɔtəpu ɔku lóyo ató-abí owunyákpa. ⁴ Bréá ɔde mú wunyáa a, iku ləwólí ɔkpatə, mbubwi beba bətswətswéé mú féé. ⁵ Iku é ləwólí abutásó, ɔtínéá isi kpalobí dun. Uəwa ɔsa kwε, ⁶ táme bréá owí lelín a, ɔlɔtə mú mó, tsúfé mú nlin məyo ɔtótó. ⁷ Abí ámu ku lobun awutə, awu ámu ləbulá kítá mú, imedan. Mú su imoswie abí. ⁸ Táme abí ámu ku é ləwólí ɔsulúw wankláánsó, ɔlkwε, dan, swie abí, iku aduasa (30). Iku aduesie (60), iku é lafa (100).”

⁹ Inu ɔlɔmɔ mú ɔnó ɔbéé, “Ɔhá ání ɔbu asu onúu!”

Tóá Svá Yesu Lótáí Ayébisv

(Mateo 13:10-17; Luka 8:9-10)

¹⁰ Bréá ilesi Yesu mva sumbí ayɔpú dúanyɔ ámu pú ahá kpalobí akvá bobuo mu a, bobwií ipa há mu bεε, ɔlé yébi anfi así suna amú. ¹¹ Múú ɔlebláa amú ɔbéé, “Mli mú á, Bulu lahá mli ɔkpa ɔbéé, mlibí mu iwíegyí ámu iwí ason njaínhé. Táme nde aha bambá asón bláa ayébisv,

¹² ‘méní bówun lówun,
táme buméebi mú.

Bónu lánú,

táme bumóonu mú así.

Ní megyí alí tekí bédamlí klontə,

Bulu obési amú lakpan kíé amú.’ ”

Ató-abí Owunyápu Yébi Amv Así

(Mateo 13:18-23; Luka 8:11-15)

¹³ Múú Yesu léfité amú ɔbéé, “Ní mlinónu yébi anfi así á, mú nkáli mlóbwe asa mlónu tráhe féé así?

¹⁴ Ató-abí ámúú owunyápu amv déwunyáa amv gyí Bulu asón ámu. ¹⁵ Abí ámúú ləwólí ɔkpasu ámu gyí ahá ámúú benyá nú Bulu asón ámu alí Ɔbunsám

labelé mú lé amó kluntə náti ámu. ¹⁶ Abí amóú ðəwólí abutású amu gyí ahá amóú bonú asón ámu pé, bahə mó ansigyísú, ¹⁷ táme íniá buma nlin su á, asón ámu itamatsiá amótó yó. Mó su ní budin amósú ntée iwiasin ku itó amó asón ámu su á, inonu butedida. ¹⁸ Abí amóú ðəwólí awutə ámu gyí ahá amóú bonú asón ámu a, bahə mó, ¹⁹ táme əyí ánfito atə hiánhe iwí gywíin, pú mótó atonyahé iwí ənsípe tegyi asón ámu su. Iní su butamaswíé abí. ²⁰ Abí amóú ðəwólí əsolóv wankláánsú amu gyí ahá amóú bonú asón ámu a, butegyí mósú. Iní su itehá butəbwé yilé fé alhá atə-abí ámu loswie, iku advasa (30), iku aduesie (60), iku é lafa (100) ámu.”

*Okandíe Iwi Yébi
(Luka 8:16-18)*

²¹ Yesu léfité amó əbéé, “Butonywé əkandíe pú oló bun mósú, ntée pówá mpá ayasi? Megyí əfoákpá butəpúbian? ²² Tətə ma inwá ibénjain, iméelin əwan. Asón nainhé kuku é ima inwá buméebi mó. ²³ Əhagyíəha áni əbu asu onúu!”

²⁴ Múú əleblí əbéé, “Mlyaa asu wankláán mli asón-nutó. Itóá mlópusúsu ha mli aba á, mú kén Bulu əbópusúsu mú wankláán, lápó iku tsía mótó há mli ní. ²⁵ Tsúfé əhá áni odekléa obónu mí atosunáhé amu asi á, Bulu əbópu iku tsía mótó há mu. Táme əhá áni omedékléa obónu mú asi á, Bulu əbóswí mu kpalobí amóú alabí ámu kóráá.”

Oyi-ibíá Idəddan Iwi Asón

²⁶ Yesu létrá blí əbéé, “Bulu iwíegyí amu igyi fé alhá əha todú oyi-ibí mu ndətə. ²⁷ Ní owí itá á, əhá ámu tekleđi. Ní əyí ike a, ətelákósú, táme omeyín alhá itəbwé asa oyi-ibí ámu itəkwə dan. ²⁸ Əsolóv onutó tēhá mú təkwe. Itegyankpá lé atə, wá ntswítswí,

asa itəbəwε abí onutó. ²⁹ Táme ayó ámu inyá bli pé, ədópu amu latsú mu ədayí əyétin mú, tsúfé mú tɪnbɪ lafun.”

Takyí-akpin Ibi Yébi

(Mateo 13:31-32, 34; Luka 13:18-19)

³⁰ Inu Yesu léfité əbée, “Ntə Bulu iwíegyi ámu ləlian? Ntéε yébi məmu nópusúná alí igyi? ³¹ Igyi fé takyí-akpin ibí. Mógyí túkúríibi nyí-abító féé ní. ³² Táme ní idan a, itəbwé ífá fúáhé dɔn ífá ku-gyíku. Mú abámbi tekpíkpli, mbubwi buɔogyónká mú asi.”

³³ Oletsíá pú ayébi anfi odu tsətsəɔtsə súná amó ató, yófun alí ahá ámu bétalí nú mú asi. ³⁴ Əmebláa amó asón kəkúá imegyí ayébi əlɔputóí. Táme ní isí mva mu akasípó nkɔle a, ətelé tógyító asi.

Atsufú Asɪbá

(Mateo 8:23-27; Luka 8:22-25)

³⁵ Alí eke ámu ntópweɔv á, Yesu lébláa mu akasípó əbée, “Mliha afa Galilea əpu yɔ mú əbɪn!” ³⁶ Múú bowie əklɔntə, akasípó amu beplá mú, benatí sí ədɔm amu. Nklɔn bámbá ku é lobuo amó. ³⁷ Afú kpənkpənkpəntɪ ku lówa tsúɔn bi. Mú sɔ ntsu dɛda wíé əklɔn amɔtə, ideklé ime. ³⁸ Táme Yesu mú ηélin sumuɔv əklɔn amu əma ədɛdɪdɪ. Akasípó amu betsinkí mu. Múú befité mu beε, “Osunápú, íniá anidé ntsu wie á, fɔmotsu kəkú lé mótó?”

³⁹ Inu Yesu lókɔsú lé ənó wa afú ámu, əlebláa əpu amu əbée, “Kpa ənó bun! Dɪ díin!” Inu afú ámu lési tsúɔn, inu féé ləlvá. ⁴⁰ Múú əlefité amó əbée, “Ntogyi só mlidé ifú nya alí? Mlimá hógyi?”

⁴¹ Ifú ləhɪe kítá amó, befité aba beε, “Nyankpɔusa əməmu ni, afú móa ntsu kóráá tonú mu əme alí?”

5

Ἦγε Laláhe Gyáa Le Ogbedépótō
(Mateo 8:28-34; Luka 8:26-39)

¹ Bréá Yesu mva mu akasípó amu bowie Galilea ὄρου amu ὄβιν Gerasefō* ὄσολόσου á, ² olenya kplí dáli ὄκλοντο alí, oyin ὄκβά ὄγε laláhe bu mvoτῶ lédali tsu afúli opulákpa befia mu. ³ Oyin ánfi lapú afúli opulákpa ínu bwé mu otsiákpa. ὄhíe ὄbu iyin. Mú su ὄhaa tamatráa talí bwé mu otsia díin, ntéε wá mu ikan. ⁴ Tsúfé tekí betsiá wá mu ayabi pú mu íbu íkan, támε oletsia tìn mú, bíábía íkan amu tsálífwí. ὄhaa é má ὄwvnlín ání ὄbétalí pón mu. ⁵ Ekekegyíεke ὄpa móa onyé féé á, ὄbu afúli opulákpa ínu móa abvsv, ὄδε okitikíti, ὄδερυ abwi tsantsan íwi.

⁶ Olenya wun Yesu sísí alí, ὄlesrí yéda akpawunu mu ayabitō. ⁷ Múó ὄlsvrā okitikíti kóklókúó ὄbéε, “ὄsúsúsú Bulu mu Bi Yesu, amansu igyi? Tanu Bulu ání fvméεpití mí ató!” ⁸ ὄleblí asón ánfi, tsúfé Yesu lébláa mu ὄbéε, “ὄγε laláhe, dali oyin ánfitō.”

⁹ Inu Yesu léfité mu ὄbéε, “Nkálí butetí fō?”

ὄlele mú ὄnó ὄbéε, “Mí dá gyí, “ὄdōm’, tsúfé anihíε aní tsó.” ¹⁰ Inu ὄγε laláhe amu behie kókóli mu beε, ὄmágya amú lé Gerasefō ὄσολού amvsv.

¹¹ Mprákuo tsatsōtsō aku budegýí okúku kusu ínu fón. ¹² ὄγε laláhe amu bokokóli mu beε, ὄhá amú abuyowie mprákuo ámvoτῶ. ¹³ Múó ὄleha amú ὄkpa. Bedali oyin ámvoτῶ yówie mprákuo ání bóbwe fé mpím-anyōτῶ (2,000). Amú féé besrí kplí okúku ku wíε ὄpu amvoτῶ, wúwu.

¹⁴ Mprákuo ámu akpapó besrí yéblí asón ánfi ilaba anfi awúlusu pú nkudasí féé. Ahá bedali beε

* **5:1** Gadarafo bu nwoló dada amu akoto.

bebá beki tṵá ilaba. ¹⁵ Bréá beba bowie Yesu wá á, bowun ání oyin ámúú òḡe laláḡe betsiá mṵtṵ ámú ansítṵ ladí, alawá atadiḡe otsie. Uḡwa amú ifú. ¹⁶ Ahá ámúú bowun tṵá ilaba oyin ámúú teki òḡe laláḡe tsie mṵtṵ ámú pṵ mprákuo ámúsu ámú bebláa amú tṵá ilaba fḡé.

¹⁷ Inu bokokóli Yesu beḡ, òdálí amú òsolúsu.

¹⁸ Bréá olowie òklun amṵtṵ á, oyin ámúú teki òḡe laláḡe tsie mṵtṵ ámú lókokóli mu òbéḡ, òhá amṵbuo mu natí.

¹⁹ Táme Yesu méha mu òkpa. Mboun òlebláa mu òbéḡ, “Yinki yṵ fú apíó wá wóyítṵ, afuyḡebláa amú itṵ yiléá aní Wie Bulu labwé há fú, pṵ alíá alawun fu nwe.”

²⁰ Mṵ su oyin ámú lénatí tsuntṵon, òde itṵ yilé ámúú Yesu labwé há mu blí Dekapoli† awúlu amú fḡé. Ònó lobwie ahá ámú fḡé.

*ḡhande ḡku Mu Bi Mva ḡtsi ḡku Iḡ Tsa
(Mateo 9:18-26; Luka 8:40-56)*

²¹ Yesu léla fá ḡpu amú yṵ mṵ òbín. Bréá òbu ḡpu ònó inu á, òḡm kṵnkpṵnkpṵntí beba bobomlí mu.

²² Inu Yudaḡ ofiakpa ḡhande òkuá butetí mu Yairo léba inu. Bréá olowun Yesu a, òleḡa akpawunu mu ayabitṵ, ²³ kókóli mu òbéḡ, “Mí bí tsíhé déwu. Ba, afṵḡḡpu ibí dínka mṵsu, mu awútṵ iwa mu ònlín, onya nkpa.”

²⁴ Mṵú mva Yesu benatí bṵyṵ á. ḡḡm kṵnkpṵnkpṵntí beklá buo mu, kpá pútá mu.

²⁵ ḡtsi òku é bu ahá ámṵtṵ, obugya de mu wolí nfi dúanyṵ ní. ²⁶ Alahíé wun ipian ilṵ atsapú tsṵtsṵtsṵ ibitṵ, húl mu iwísu atṵ fḡé, támḡ ilṵ ámú imekálá bwé mu. Iyin idḡwa tsía. ²⁷ Bréá ḡtsi ánfí lónu Yesu nka

† 5:20 Dekapoli así gyí awúlu dú.

á, ɔlɔtsʊn yɔ mu ɔma, fifitíwíe ɔdɔm amʊtɔ yópu ibi da Yesu atadiɛ. ²⁸ Tsúfɛ ɔleblí wá mu nwuntɔ ɔbéɛ, “Ní nɔpó ibi da mu atadiɛ kpán á, ilo ámu ibési mí.”

²⁹ Olenya pú ibi da mu atadiɛ ámu ali, obugya amu léka itin. Olonu mú nka mu awútó ání ilo ámu lasí mu. ³⁰ Inu Yesu lónu mú nka mu awútó mu é ání ɔhɛ kv ladáli mʊtɔ. Inuɔv ɔledamlí ki ɔdɔm amu, ɔlefíté amú ɔbéɛ, “Ma lápú ibi da mí atadiɛ?”

³¹ Mú mu akasípú amu befité mu beɛ, “Fú onutó fawun ání ɔdɔm bakpá pútá fu. Mú fu tráa fudefité feɛ, ‘Ma lápú ibi da mí?’ ”

³² Yesu lówa ansí ki amótó féé, ɔde ɔhá ání ɔlɔpu ibi da mu dunká. ³³ Ifú lékitá ɔtsi ámu. Mú sv ɔlɔwa kpínkí kpakpakpakpa bi, tsúfɛ oyin itá alanyá. Inu ɔleba beɛda akpawunu Yesu ayabito, bláa mu ɔnɔkwali amu féé. ³⁴ Yesu lébláa mu ɔbéɛ, “Mí bí, fú hógyi laho fu nkpa. Natí iwilwiitɔ. Fú ilo ámu ita.”

³⁵ Bréá Yesu bu mósó ɔdetóí á, aha aku botsu ofiakpa ɔhandɛ amu wóyító ba bebláa mu beɛ, “ɔhandɛ, fú bí tsíhé ámu ɔdikpa mówa alé. Mátepi trá wa osunápú tó.”

³⁶ Yesu mékplá asón ámuú buɛleblí ámu. Mboún ɔlebláa mu ɔbéɛ, “Mánya ifú. Fú mú hógyi wule.”

³⁷ Yesu méha ɔhaa ɔkpa obuɔ mu dʊn Petro pú Yakobo muva mu pio Yohane nkule. ³⁸ Bréá bowie ɔhandɛ amu wóyító á, Yesu lówun ání ahá babólá inu, buɛsú, buɛde okítikíti. ³⁹ Olowie inu fíté amú ɔbéɛ, “Ntogyi só mlidé ipian wúun, mlidé okítikíti ali? Otsibi amu mókówú, didí ɔde.”

⁴⁰ Ahá ámu bɔmɔsí mu. Mú olegya amú féé dálí ba wunsiné, ɔlekpa obí ámu akwíró pú mu akasípú amú búbuɔ mu amu bebitíwíé obu ámuú otsibi amu da mótó ámʊtɔ. ⁴¹ Inu ɔlekítá kebi ámu ibi, bláa

mu amú òblítò òbée, “Talita Kuum!” (Mó así gyí, “Obitebí, kusu!”)

⁴² Inuṣu òlòkúṣò òna. (Otsibi amu lahò nfi dúanyò.)
 Pòbowie ahá ámu fée ònó dáfá. ⁴³ Múy òlèda amú òlá kinkíinkín òbée, bómábláa òhaa asón áñfi. Inu òlèbláa amú òbée, buháa kebi ámu ató ogyi.

6

Bumòhò Yesu Mu Wúlutò *(Mateo 13:53-58; Luka 4:16-30)*

¹ Yesu mwa mu akasípó bedalí òmá ámuṣò yínkí yó mu wúlutò. ² Òkpónú òdaké lenya fun alí, òlòyò òde ató suná Yudafo ofiakpa. Mu atosunáhé lèha ònó lobwie ahá tsòtsòtsòá bonu mú. Mú su bẹfité aba bée, “Nkúnú olenya nyánsa múa ofúlábwe túmi áñfi é tsú? ³ Megyí ató osrépó amu ni. Megyí mu yin gyí Maria, mu apio yinhé gyí Yakobo, Yosef, Yuda pú Simon? Yée ania mu apio tsihé é tsie nfi á?” Benya òbló muṣu.

⁴ Yesu lébláa amú òbée, “Ahá butobú Bulu ònósú òtòípó òtínegyíótíné, táme mu wúlutòfò, mu abusuanfò pú mu wóyítò ahá mú butamabú mu.”

⁵ Iniá bumòhò mu gyi su òmetalí bwé ofúla kòkò, òun ahá kpalobí akusu òlòpò ibi dínká, tsá amú ilò.

⁶ Ilòwa mu ifú ání bumòhò mu gyi.

Akasípó Dúanyò Amu Sumbiwa *(Mateo 10:5-15; Luka 9:1-6)*

Yesu léki nkuda ání ibu bomlí inu así, òde ató suná. ⁷ Inu òletí akasípó dúanyò ámu ba mu iwí wá. Múy òlòwa amú sumbí abanyó-abanyó. Òlèha amú túmiá bópogyi òḡe laláhesu. ⁸ Òlèda amú òlá òbée, “Mlumátsu tòtò kítá yó òkpa ámu, òun mli oyi yiáhé! Mlumátsu atogyihe ntée akpankogyo,

ntée kóba kítá! ⁹ Mliwa ntokota, táme mlimátsu atadie nyɔasi kítá! ¹⁰ Wóyígyíwóyíá mlɔswí mótó á, mlitsia inu yófon bréá mlédali wúlu amvɔ. ¹¹ Ní mlɔyó wúlu kusu, bumɔhɔ mli, ntée bumekleá bónu mli atosunáhé, mlidédali mótó mlɔyó á, mlikpakpa mli ayabitɔ-isi woli inu, isuna ání bumebi bwé.”

¹² Mú su bɔyɔ yéda asún ámu akan bee, ahá buɔámli kluntɔ. ¹³ Begya ɔɛ laláhe tsɔtsɔtsɔ lé ahátɔ, bekpa alɔpu tsɔtsɔtsɔ é ofobi, tsá amó ilo.

*Asú Ɖɔɔpó Yohane Lowu
(Mateo 14:1-12; Luka 9:7-9)*

¹⁴ Galilea ɔmású ogyípó Herode lónu Yesu iwɔ asún áni, tsúfé mu idayilé de ɔtínegyíɔtíne. Aku buɔdeblí bee, “Asú Ɖɔɔpó Yohane lákósó tsú afúlitɔ. Mú só, ɔde ofúla anfi odu bwe ní.”

¹⁵ Táme aku é bee, “Bulu ɔnósú ɔtɔ́pó dada Elia ní.”
Aku é bee, “Bulu ɔnósú atɔ́pó dada amvɔ ɔku ní.”

¹⁶ Bréá Herode lónu asún ámu a, ɔleblí ɔbéé, “Yohane amúú neha betin amu látsínkí tsú afúlitɔ.”
¹⁷⁻¹⁸ Herode léha bekítá Yohane, wá mu ikan, pú mu wá obu. Tsúfé oletsiá bláa Herode ɔbéé, mbla meha ɔkpa ání obétsiá mu pio Filipo mu ka Herodia amúú otsia amu.

¹⁹ Mú su Herodia lóhɔ Yohane asún wá iwɔtɔ. Ɖɔɔbwe agywun ání ɔbómɔ mu, táme ɔmetáli, tsúfé Herode méhá mú ɔkpa. ²⁰ Herode yin ání Yohane asún da ɔkpa, ogyi ɔha wankíhé. Mú su olenya mu ifú, ɔleki musu wankláán ání tɔtɔ móɔbwe mu. Ibo mótóá Yohane asun blíhé tehan Herode, táme otekle mú nu.

²¹ T́sá Herodia dédunká léba ha mu. Eke ɔkúá Herode dé mu ɔkwíké gyí a, ɔlɔswɔ ɔpónú, tí ahande pú isá akɔpú dehen pú Galileafɔ ahande ba ató ámu

ogyíkpá. ²² Bréá Herodia mu bi tsíhé lóbowie ɔbɔntɔ tsa a, ɪɔwa Herode mu ahande amu féeé ansigyí. Herode lébláa mu ɔbéé, “Fíte mí tógyítáá fɔdeklé, néha fú.” ²³ Inu ɔleka ntam há mu ɔbéé, “Néha fɔ tógyítáá féfíté mí. Ní igyi mí iwíe ogyíkpá ifɔn kóráá.”

²⁴ Otsibi amu lédalɪ yéfíté mu yin ɔbéé, “Ntɔ nfité?”

Mu yin lébláa mu ɔbéé, “Fíte Asú Ɖɔɔpó Yohane nwun.”

²⁵ Ɖsasɔ otsibi amu léba bebláa Herode ɔbéé, “Ndekléá fɔpó Asú Ɖɔɔpó Yohane nwun dɪnka ɪlɪnsú ha mɪ séséséí.”

²⁶ Asún ámu léhiɛ han owíe amu, táme mu ntam amú ɔleka, pú ahá ámuɔ bɔbɔ inu ámu sɔ á, omekleá ɔbótɔn ntam amu. ²⁷ Inuɔ ɔɔwa mu ahá ɔtɪnɔ ɔbéé, ɔyétɪn Yohane nwun ba mu. Ɖɔɔɔ yétɪn Yohane nwun obu ɔɔɪkpá inu. ²⁸ Múú ɔɔpɔ nwun ámu dɪnká ɪlɪnsú ba otsibi amu, mu é ɔɔpɔyáa mu yin Herodia. ²⁹ Bréá Yohane akasípó bonu asún ánfɪ á, beba botsu mu satin yópulá.

Ahá Mpím-nu Atogyihɛ Ha

(Mateo 14:13-21; Luka 9:10-17; Yohane 6:1-14)

³⁰ Yesu sumbí ayɔpó ámu beyinkí bá bebláa mu atáá bayóɔwe pú múá bayósuná féeé. ³¹ Mú ɔma a, ahá bɔna amú wá alɪ, bɔmenyá ɔkpa gyi ató kóráá. Mú sɔ ɔlebláa amú ɔbéé, “Mliha ayɔ itsétó fléén, ayɛda ɔkpúnú.” ³² Inu bowie ɔklɔntɔ, pú ɔkpa bɔyó itsétó ɔtɪnekɔ.

³³ Táme ahá tsɔtsɔɔtsɔ bowun amú, bí ɔtɪnéá bɔyó. Mú sɔ botsu awúlu ámu féesú, tsíí ɔsrú gyankpá yówie ɔtɪné ámuɔ Yesu aná bɔyó ámu.

³⁴ Bréá Yesu lékplí dáɪ ɔklɔn amɔtɔ, wun ɔɔm kɔɔnkɔɔnkɔɔntɪ ámu a, amú asún ɔwa mu nwe,

tsúfè bɔgyi fè akúfa ání boma ɔkparú. Mú su olo-suná amó ató tsɔtsɔtsɔ. ³⁵ Owí lɔpɔn a, akasípú amɔ beba mɔ wá bebláa mɔ beɛ, “Itsétó nfi gyí, owí é latá. ³⁶ Ha amó abɔyɔ nkuda múa awúlu ání ɔbu bomlí nfi así yodunká tɔku gyi.”

³⁷ Táme Yesu léle mú ɔnó ɔbéɛ, “Mlɔdunka ató ha amó abɔgyi.”

Mó bɛfité mɔ beɛ, “Abétalí nyá sika* hɔ ató há ahá ánfí fèé bégýi?”

³⁸ Yesu léfité amó ɔbéɛ, “Bodobodo apin afíní mlɔbɔ? Mlɔyɔ amlɔyɛkí!”

Beyínkí bebláa mɔ beɛ, “Bodobodo apin anu pú ntsutso iye bwáhé anyɔ bu ɔnu.”

³⁹ Yesu lébláa amó ɔbéɛ, “Mlɔha amó abɔtsiatsia ífá bɔbwɛ amɔsu.” ⁴⁰ Betsiá así akúsó-akúsó, akɔ lafa (100), akɔ é aduenu (50). ⁴¹ ɔnu olotsu bodobodo anu pú ntsutso iye bwáhé anyɔ ámu. Mó olotsu ansí fúá kí ɔsúsó, ɔleda Bulu ɔpán. ɔnu olebiabía bodobodo amɔ há mɔ akasípú amɔ ɔbéɛ, bɔyée ha amó. Oleye iye bwáhé anyɔ ámu é há amó, bɔpɔhá ahá ámu. ⁴² Amó fèé begyi mwe sian. ⁴³ Akasípú amɔ bɔtɔsí bodobodo múa iye sianhe amɔ a, ɔlɔbolá alakpá dúanyɔ. ⁴⁴ Ayin ání begyi ató ámu nkɔle bɔgyi mpím-nu (5,000).

Ɔpɔsu Natí

(Mateo 14:22-33; Yohane 6:15-21)

⁴⁵ Benya gyi ató ámu tá alí, Yesu lébláa akasípú amɔ ɔbéɛ, bɔwíe ɔklɔntɔ abɔgyankpa fa ɔpu amɔ yɔ Betsaida wúlutɔ. Mɔ mú olesin ɔma sí ɔdɔm amɔ ɔkpa. ⁴⁶ Bréá olesi amó ɔkpa tá á, ɔlɔdɔ yó busu

* **6:37** Sika ánfí igyi sika futútú lafa-anyɔ (200), igyi ɔha nke lafa-anyɔ (200) ɔkóká.

yóbò mpái. ⁴⁷ Bréá owí leta, òklòn amò lawíé ntsu nsíné á, ilesi Yesu nkole ibu ámòsù. ⁴⁸ Inu olowun ání òklòn amò plá de ònlìn wa wá akasípó amò, tsúfè afú kpònkpòntì detsùbùn fia amó. Bake-bake a, Yesu lénatí ntsu ámòsù ayabitò buo amó, odeklé òtsùn amósó. ⁴⁹ Táme bréá bowun m̀v a, bukì b̀e, fúli ogyi. M̀v s̀v b̀sòrá okitikìti. ⁵⁰ Opúni letsíi amó f́é.

Táme òlòwa òsa bláa amó òb́e, “M̀lwa klòn. M̀ ní. M̀límányà ifú.” ⁵¹ M̀ó òlòd̀v wíé òklòn amòtò, afú amò leka itin á. Asún ánfì l̀wa amó wánwan. ⁵² Amó klòntò-odwin s̀v b̀m̀òkónyá nú bodobodo iwí asún amò asì.

Genesarefò Alòp̀v Tsa (Mateo 14:34-36)

⁵³ Yesu m̀va amónyò b̀efa òp̀v amò yési Gene-saret otsubúnò, b̀òwa òf́é kítá òklòn amò. ⁵⁴ Benya kplí dáli òklòn amòtò alí ahá bowun Yesu, bí m̀v òtsáwùle pé. ⁵⁵ M̀v s̀v b̀esrí yòtsu amó alòp̀v s̀rá akpasu, tsú ntíné-ntíné b̀òt̀v m̀v inu. ⁵⁶ Òtínegyíòtínéá Yesu l̀yò, igyi wúlutò ntéé akuda ó á, b̀òp̀v amó alòp̀v b̀òtswí br̀ònsù, kókóli m̀v b̀e, òhá alòp̀v amò ab̀p̀v ibi da m̀v atadié òdanó kpán. Amóá b̀òp̀v ibi da m̀v f́é benya òlòtsá.

7

Atitífò Amándíé (Mateo 15:1-9)

¹ Farisifò p̀v Mose m̀bla asunápó aku b̀otsu Yerusalem ba b̀efia Yesu wá. ² M̀ó bowun ání m̀v akasípó amò aku b̀m̀òfwí ibi amándíé òkpasu asa b̀v̀de ató gyí.

³ (Tsúfè Yudafò, títriu Farisifò b̀m̀òkósí amó anáin amándíétó. M̀v s̀v ní b̀m̀òkóf̀wí ibi amándíé

okpasu á, butamagyi ató. ⁴ Alí kén ní bumokógyóra iwí á, butamagyi tóá bopotsúa bíású ba ni. Amándié bámbá ku aná é bu inu, butráa bude mótó tsú nwe núu ntsu, nló pó nlanka iwí.)

⁵ Mú su amóa Mose mbla asunápú befité Yesu bee, “Ntogyi só fú akasípó amu butamagyi aní anáin amándiésú, bumofwi ibi amándié okpasu asa abugyi ató?”

⁶ Yesu léle mú onó obéé, “Onokwali Bulu onósú otóipú Yesaia lébli tswi tsú mli apinabwebí abwepó ánfí iwí obéé,

‘Ahá ánfí budepu amó onó bú mí,
táme amó klón bu ifó mí wá.

⁷ Kpaali bude mí sum,
tsúfé basí Bulu mbla tswi,
yó bude anyánkpósa mbla suná.’

⁸ “Mlilasi Bulu mbla ámu tswi, mlidé mli anáin amándiétó.”

⁹ Inu olebláa amó obéé, “Mlilapina si Bulu mbla ámu tswi nyánsatò, méní mlégyi mli onutó amándiésú. ¹⁰ Tsúfé Mose lówanlín wá Bulu mbla ámutò obéé, ‘Bu fú sí muva fú yin.’ Oletrá wanlín obéé, ‘Ní oko lébli asokpan tsú mu si ntéé mu yin iwí á, bumóó mu.’ ¹¹ Táme mli mú mliaa, oha obétalí bláa mu si ntéé mu yin obéé, ‘Tóá teki nópohá fú á, napóbwé Koban.’* ¹² Mlilahá ahá bumedé tótò bwe há amó akwípó. ¹³ Mli anáin amándié so mlitráa mlumédé Bulu mblasu gyí. Ntobí tsotsotsò é bu inová mlitráa mlidébwe tsía ínítò.”

*Tóá Itokpóí Oha Bulu Ansító
(Mateo 15:10-20)*

* **7:11** Koban así gyí, napókíé Bulu.

14 Yesu létrá ti ɔdɔm amv ba mv ɪwɪ wá, ɔlebláa amú ɔbéε, “Mli féé mliyaa asv amlinu ínɪ asi! 15-16 Megyí tóá ɔha tegyi tókpóí mv Bulu ansító. Mboún móá itedáli tsu mv ɔnó.†”

17 Bréá ɔlenatí sí ɔdɔm amv yó wóyító a, mv akasípó amv befité mv yébi anfi asɪ. 18 Ɔlele mó ɔnó ɔbéε, “Mli é mli-tamanú asún asi? Mli-méyín ání tóá itowíé ɔha ɔnó tamakpóí mv Bulu ansító? 19 Tsúfé megyí mv klɔntɔ itowíé, mboún mv iputɔ itowíé, ɔteyéle mó wá ɔkpɔntɔ.” (Yesu léle mótó púsúná ání atogyihe kugyíku ɪwɪ letɪn.)

20 Inu ɔlebláa amú ɔbéε, “Tóá itedáli tsu ɔha klɔntɔ tókpóí mv Bulu ansító. 21 Tsúfé ɔha klɔntɔ ágywun laláhe kugyíku tedáli tsu. Mótehá mv ɔtɔwá atɪ móa ayin asún, ɔtowí ató, ɔtɔmó ɔha, ɔtɔtɔ mbvɔ, 22 ɔtɔwá ɔnsɪpe, ɔtɔbwé lalahε, ɔtemlé ahá, ɔtɔwá hakpan, ɔtɔwá olu, ɔtetsii ɔha, ɔtotsú ɪwɪ, ɔtɔbwé mimlála. 23 Ɔha klɔntɔ, atɔ laláhe anfi féé itedáli tsu. Mótókpóí mv nu.”

Ɔtsɪ Ɔkɔá Omegyí Yudayin Hógyi
(Mateo 15:21-28)

24 Yesu lénatí inu yó Tiro nsáintɔ. Ɔlɔyóswú wóyí kɔtɔ. Omedéklé ɔbéε ahá bobú ání maba inu, támε ɔmetalí nájín mv ɪwɪ. 25 Ɔhe laláhe bv ɔtsɪ ɔku mv bi tsihétó. Olenya nú Yesu nka alɪ, ɔlɔwa ɔsa beda akpawunu mv ayabitɔ. 26 Griikiyintse ɔtsɪ ánfi gyí. Bɔkwú mv Siro Foenike ɔsulósv. Olokokóli Yesu ɔbéε, ogyáa ɔhe laláhe amv le mv bi ámvɔtɔ. 27 Támε Yesu lébláa mv ɔbéε, “Ha nyebí ámv abumwε asa, tsúfé ima aleá fósúwí nyebí atogyihe póhá akíai.”

† 7:15-16 Mótó yée 16 bv nwló dada amv akɔtɔ: Ɔhagyíɔha ání ɔbv asv, onúu!

28 Ὡςτι ἄμυ λέλε μύ ὀνό ὀβέε, “Owíé, ἔβυ μύτό αλ, táμε ακίαι ἀνί βυδα ὀπόνύ ἄμυ ασί ἐ βυtegyi nyebí atogyihe mpupubiá ἰτεkpákpa bun amú ὀπόνύασι.”

29 Μύ Yesu λέβλάα μυ ὀβέε, “Fabí lé μύ ὀνό. Μύ sv nati, ὀηε laláhe amv ladáli fú bí tsíhé áμυτο.”

30 Βρέά ὀςτι ἄμυ λόγῳ wóyító a, olowun ἀνί ὀηε laláhe amv ladáli μυ bi áμυτο, alási ὀda mpásó.

Yesu Létsa Isvtín Ὤkvá Ὤtamatói Wankláán

31 Yesu lénatí Tiro ἔνυ γό Sidon γóβomlí kplí ba Dekapoli‡ awúlu amv nsáintó asa ὀeladú γó Galilea ὀρυ ὀνό. 32 Βῶρυ ἰsvtín ὀkv ba μυ, ὀtamatalí tói wankláán. Bokokóli μυ βεε, ὀρύυ ἔβυ dinka μυsv.

33 Μύ ὀlekpa oyin ἄμυ ya ἰfóntó, pú μυ asrebi wá oyin ἄμυ asútó, olotu atsvnó dínká μυ osrebisv, púdá oyin ἄμυ ὀdandvsv. 34 Ἴνυ olotsu ansí fóá kv ὀsósó, lón ὀηέ fó. Μύ ὀleblí ὀβέε, “Hefata.” Hebri ὀblító. Μύ ασί gyí, “Finki.”

35 Ἴνυsv μυ asv lefinkí, μυ ὀdandv ἐ lesankí, ὀlótó wankláán. 36 Μύ Yesu léda ahá ἄμυ ὀlá kpákpaákpa ὀβέε, bvmábláa ὀhaa. Táme tsé dúbúdúbúá ὀleda amú ὀlá á, alí kén βeda asún ἄμυ ὀkan ni. 37 Ὤνό lehiε bwíé amú, beblí βεε, “Alabwé tógyító wankláán. Alahá asvtín βυde asún nu, amúmu ἐ βυdetóí.”

8

Ahá Mpím-na Atogyihe Ha (Mateo 15:32-39)

1 Nke áμυτο á, ὀdóm kpánkpvὀnkpvntí βetrá befia Yesu wá. Amú atogyihe letá. Μύ sv Yesu létí μυ akasípú, bláa amú ὀβέε, 2 “Ahá ἀnfi asún de mí nwe wa. Nde eke sáásí ὀpá βυbuo mi. Βυtráa buma totóá

‡ 7:31 Dekapoli ασί gyí awúlu dú.

bégyi. ³ Ní nehá amó bəpó akón náti bəyó wóyí á, ansító béyébi amó əkpatə, tsúfé amútó aku əkpa bu ifó.”

⁴ Mú akasípó amu bəfité mu bεε, “Nkónú abénya atogyihe há ahá ánfí fée bégyi mwe dimbí ánfisu.”

⁵ Yesu léfité amó ɔbéε, “Bodobodo afinu mliɔ?”

Bεε mú ɔnó bεε, “Asienó.”

⁶ Yesu léha ɔɔm amu betsiá ɔsulótə. Mú olotsu bodobodo asienó ámu, dá Bulu ipán, olebiabía mótó há akasípó amu beye mú há amó. ⁷ Bubu ntsutso iye bwáhé kpalobí ku é. Yesu lóyulá músó, ɔɔpu mú é há akasípó amu, beye ha amó. ⁸ Amú fée begyi mwe. Akasípó amu bətsí isianhe bólá alakpá yilé asienó. ⁹ Ahá ámu bóbwe fé mpím-na (4,000), Yesu lési amó əkpa. ¹⁰ Inonu muva mu akasípó bədu wíé ɔklontə ba Dalmanutafə ɔsulósu.

Farisifə Bodunká Ofúla

(Mateo 12:38-42; 16:1-4)

¹¹ Farisifə bonu ání Yesu laba mu, beba bude mu asún fité. Bεbláa mu bεε, ɔbwée osúna pusuna amó ání lélé otsú Bulu wá. ¹² Yesu lólɔn ɔhé fú. Mú ɔlefité amó ɔbéε, “Ntogyi sɔ mli ndemba-abí mliɔ osúna dunká amliwun? Mbláa mli ɔnəkwalí. Mmóɔbwe osúna kuku súná mli!”

¹³ Inu ɔlenati sí amó, yó du wíé ɔklontə, fá ɔpu ámu yó mú ɔbin.

Farisifə Pú Owíe Herode Bodobodotu-afá

(Mateo 16:5-12)

¹⁴ Yesu akasípó amu bumekaín tsú bodobodo kítá. Ipin kule pé bu ɔklɔn amutə. ¹⁵ Bréá buɔn ntsu ámuɔ bəyó á, Yesu léda amó ɔlá ɔbéε, “Mliki wankláán Farisifə pú ɔmású ogyípú Herode bodobodotu-afású.”

16 Akasípó amu befité aba beε, “Bodobodo amóú animédé ámu sù òde asún ánfí blí lóó?”

17 Yesu lónu asún ání buεblí. Múú òlefíté amó òbéε, “Ntogyi sù mlidéblí mliaa, mlimédé bodobodo? Mú sù ìkluntò bu mli odwin mli é?”

18 Mli ansíbi tamawun ató, mli asu é tamanú asún? Mlitamakáín asónsù? 19 Bréá neye bodobodo apin anu ámu há ahá mpím-nu (5,000) á, isíanhe alakpá afinu mlilótásí?”

Bele mú onó beε, “Dúanyò.”

20 “Bodobodo apin asienó amóú neye ha ahá mpím-na ámu é mé, isíanhe alakpá yilé afinu mlilótásí?”

Bele mú onó beε, “Asienó.”

21 Inu Yesu léfité amó òbéε, “Imòkúwánkí mli kí?”

Ansibi Obwiepó Oku Ansibi Bwií

22 Yesu muva mu akasípó beba Betsaida wúluto. Aha aku bekpá ansibi obwiepú oku ba. Bobwií ipa há mu beε, òpúu ibi da mu, òtsa mu ìò. 23 Yesu lékitá ansibi obwiepú ámu ibi, kpá mu dáli wúlu amuto. Inu olotu atsunó dínká oyin ámu ansíbisu, pú ibi dínká musu. Múú òlefíté mu òbéε, “Fude ató wúun?”

24 Ansibi obwiepú ámu lótsu nwun fúá kí, òleblí òbéε, “Nde anyánkpsa wúun, táme bugyi fé nyí bua.”

25 Inu Yesu létrá pu mu ibi dínká mu ansíbisu. Oyin ámu lóbwií ansibi kí a, mu ansibi lawá alé, òde tógyító wúun wankláán ngya. 26 Yesu léyinkía mu sísí wóyító òbéε, “Nati laa yò wóyí. Mátepi wíé wúlu amuto kóráá.”

Ọhá Aní Yesu Gyí

(Mateo 16:13-20; Luka 9:18-21)

27 Yesu muva mu akasípó amu benatí iuv boýó Kaesarea Filipi awúlusu. Bréá buna okpatò á, òlefíté amú òbéé, “Ma ahá bee ngyi?”

28 Bele mú ònó bee, “Aku bee, fúgyí Asú Òbòpú Yohane. Aku bee, Bulu ònósú òtáipó Elia. Aku é bee, Bulu ònósú atáipó amutò oku.”

29 Mú òlefíté amú òbéé, “Mli é mé? Mlia mígyí ma?”

Petro léle mú ònó òbéé, “Fúgyí Kristo, (òhá á múú Bulu ladá mu ofúli amu) ni.”

30 Iuv òleda amú òlá òbéé, “Mlimábláa òhaa mí iwi asón ánfí.”

*Yesu Iwiasin Pó Mv Lowu Iwi Asón Blí
(Mateo 16:21-28; Luka 9:22-27)*

31 Iuv Yesu léfi así òde asóntó le súná amú òbéé, “Ilehían ání mí, Nyankpòsa-Mv-Bi ánfí néhie wun iwiasin tsatsòtsò. Yudafo ahande, Bulu igyí ahapú òehen pú Mose mbla asunápó féé bekiná mí bee, megyí mígyí Kristo amu. Bómò mí, táme Bulu òbélakósóa mi tsú afúlitò nkensá òma.” 32 Òmòpu asón ánfí òhín amú. Mú su Petro léti mu ya itsétó yéka mu itin òbéé, òmátrá blí ali. 33 Iuv òledamli kí akasípó amu, òokplón wa Petro òbéé, “Satan, natí tei mísú! Megyí tóá Bulu dégywín fòdegywín, anyánpòsa klé fòdegywín.”

34 Iuv òleti òdòm amu pú mu akasípó ba mu iwi wá. Mú òlebláa amú òbéé, “Ní oku dékléá obóbuo mi á, osii tóá otekle bwe, otsu mu oyikpalíhe bobuo mi.

35 Tsúfé ní oku lépri mu nkpa á, òbòhulí mú. Ní oku é lóhulí mu nkpa mía Bulu ason wankláán ámusu á, Bulu òbòhò mu nkpa. 36 Ní oku onyá òyító ató féé, táme òhúlí mu òkláa a, labi mòmò òwòwa há mu?

37 Ntée ntò òha òbétalí pútse mu nkpa? 38 Tsúfé ní oku

onyá mía mí atosunáhé péli ndemba-abí laláhéá badámlí ɔma há Bulu ansító á, mí, Nyankpɔsa-Mu-Bi ánfí é nénya mu péli bréá mía Bulu-abɔpu wánkíhé amu aniná mí Sí numnyamto abá.”

9

¹ Yesu lóyɔ mu tóisɔ ɔbéé, “Ɔnɔkwali nde mli bláa. Aku bubu mlito nfi bɔmóowu, yófun bréá bawun ání Bulu iwíegyi amu ina túmisɔ ibá.”

Yesu Iwitsée

(Mateo 17:1-13; Luka 9:28-36)

² Nkensisé ɔma a, Yesu lékpa Petro, Yakobo mva Yohane, mva amónyɔ bɔɔv yó ibu kusɔ amó nkule. Inu Yesu létse amó ansító. ³ Mu atadiε ledamli futúúúúú, ide ogyá kpa. Tɔto ma ɔsulɔv anfisvá ibétalí bwé mú ibófulí alí. ⁴ Inu Elia mva Mose bele iwí ɔwan, amóa Yesu bɔdɛtɔí. ⁵ Mú Petro lébláa Yesu ɔbéé, “Osunápó, ibu aléá abétsiá nfi. Ha ada abú asa. Fú klé kule, Mose klé kule, Elia é klé kule.” ⁶ Ifú lehiε kítá Petro mva mu aba ámu dɔbi. Mú sɔ omowun asón ání ɔbli.

⁷ Inu agyinde ku lobobun amósó, ɔme ku ledali tsu mótó ɔbéé, “Ɔni gyí mí Bí ɔdwepú ní! Mliyaa asu amlinu mu asón!” ⁸ Inu belaki, táme bɔmetrá wun ɔhaa dɔn Yesu nkule.

⁹ Bréá bɔde ibu ámu kplí á, Yesu léda amó ɔlá ɔbéé, “Mábláa ɔhaa tóá bayówun, yófun ekeá Bulu ɔbókɔsúa mí, Nyankpɔsa-Mu-Bi ánfí tsú afúlitɔ.”

¹⁰ Asón ánfí lesin amó nwuntɔ, betsiá fité aba beε, “Kusú tsú afúlitɔ ánfí asi mé?” ¹¹ Inu befité Yesu beε, “Ntogyi sù Mose mbla asunápó amu beε, ilehián ání Elia obéyinkí bá asa Kristo amu ɔbéba?”

¹² Ɔleε mú ɔnó ɔbéé, “Ɔnɔkwali igyi, ání Elia obégyankpá bá bela tógyító yái wankláán. Mú

ntogyi só Bulu ason wanlínhé amu kén léblí tsú mí iwí òbée, mí, Nyankpusa-Mu-Bi ánfí néhie wun ipian, ahá bósúpáa mí? ¹³ Ndé mlí bláa mbée, Elia layínkí bá dodo. Ahá bóbwe mu alíá budeklé, fé alíá bówanlín wá Bulu asón ámútò.”

Ilo Didaha Olóp Tsa

(Mateo 17:14-21; Luka 9:37-43a)

¹⁴ Bréá beyinkí bowie akasípó atráhe amu wá á, bowun ání òdòm kpònkpònkpònti bafia bomlí amó, Mose mbla asunápó aku bude akasípó amu nwéén gyí. ¹⁵ Bréá òdòm amu bowun Yesu a, ilowa amó wánwan, besrí yéfia mu, há mu aye. ¹⁶ Yesu léfité mu akasípó amu òbée, “Amansu mlia amónyò mlidébití?”

¹⁷ Òdòm amútò òku léle mú ònó òbée, “Osunápó, nekpa mí bí yínhé ba fu mbée afotsa mu ilò. Òhe laláhe lahá otamatóí. ¹⁸ Brégyíbréá òhe laláhe amu iba musu á, itòwòsu mu, fin mu dá osulótò. Mu ònó tóbwé afu, otówí ayín, otésínsin. Nεbláa fò akasípó mbée, bogyáa òhé ámu le mutò ha mí, táme bumetalí.”

¹⁹ Yesu lébláa amó òbée, “Ndεmba-abíá mlumá hógyi, alí nétsiá mlí wá yó ní? Yófun òmenke nnyá klòn ha mlí? Mlikpa kebi ámu ba mí!” ²⁰ Bekpa kebi ámu ba Yesu.

Òhe laláhe amu lénya wun Yesu alí, ilòwòsúu kebi ámu fin mu dá. Odemináa, mu ònó é ide afu. ²¹ Yesu léfité obí mu si ámu òbée, “Tsú bré mòmútò ilò ánfí lefi asi?”

Òlele mú ònó òbée, “Tsú mu nyebitò òpá. ²² Itòtswí mu wá ogyá múa ntsu aná féétó, itekleá ibómò mu, táme ní fétalí bwé tòku tsú mó iwí á, wun aní nwe afogyi aní buale.”

²³ Yesu léfité mu obéé, “Blí fude fee, ní nétalí? Tógyító lɔpɔn ha ohógyipɔ.”

²⁴ Inu obí mu si ámu lókplɔn blí obéé, “Nohogyi, táme mí hógyi mɔtsó. Gyi mi buale, mí hógyi imoní!”

²⁵ Bréá Yesu lówun ání ɔɔm amu butráa busrí bebá á, ɔɔkplón wa ɔɔe laláhe amu obéé, “Fú ɔɔdandubiabia móa isutin ɔɔé, dali kebi ámutɔ. Mátrá wie mutɔ ekekeke!”

²⁶ ɔɔe laláhe amu lósrá okitikíti kóklókóú, ɔɔetrá wɔsɔsɔ mu nyányányányáa, ɔɔdali mutɔ. ɔɔé leta mu. Mó su ahá ámutɔ aku beblí beé, “Alawú.”

²⁷ Táme Yesu lékitá mu ibi tsú mu fúá, ɔɔkɔsú líí.

²⁸ Mó ɔma, bréá Yesu muá mu akasípú amu nkɔle bubu wóyító a, befité mu beé, “Ntogyi só aní mó animétalí gya ɔɔe laláhe amu dali kebi ámutɔ?”

²⁹ Múú ɔlebláa amú obéé, “Iní odu mú á, nkéti mpái* pé mlétalí pógya mú.”

*Yesu Lowu Iwi Asón Blí Otse Nyɔɔsi
(Mateo 17:22-23; Luka 9:43b-45)*

³⁰ Bréá Yesu muá mu akasípú amu benatí inu á, bɔtsɔn Galilea ɔsɔlɔsɔ, táme Yesu mékléá ɔhaa ɔbí ɔtínéá muɔ. ³¹ Tsúfé ɔde akasípú amu ató suná obéé, “Béle mí, Nyankpɔsa-Mu-Bi ánfí há adón bómɔ mí, táme Bulu ɔbélakósóa mi eke sáásí.”

³² Akasípú amu bɔmonu mú asi, ifú é de amó ání befité mu.

*Ma ɔbóbwe ɔhande?
(Mateo 18:1-5; Luka 9:46-48)*

³³ Beba Kapernaum wúlutɔ. Bréá bowie wóyító á, Yesu léfité amú obéé, “Ntɔ nwéen mlidégýí ɔkpatɔ?”

* **9:29** Mpái móa ɔnókíí bu nwɔlɔ dada amu akɔtɔ.

³⁴ Bekpa onó bun músú, tsúfé ihande budepríi.
³⁵ Yesu létsiá asi, oleti akasípú dúanyo ámu, olebláa amú obéé, “Ní mlito oku dékléá obóbwe mli nkpa ogyápu a, obwéé mu iwí oma ogyápu pú mli fée osúmpú.” ³⁶ Inu olekpa kebi oku belí amú ansító, látá mu pútá, olebláa amú obéé, ³⁷ “Ohagíoha ání oloho kebiá ogyi ali mí dátó laho mi. Ohagíoha ání oho mi á, megyí mí oloho, mboun ohá ámú olowa mí ámu.”

Ani Obúopu
(Luka 9:49-50)

³⁸ Yohane lébláa Yesu obéé, “Osunápú, anilówun oyin oku dépu fú dá gya oje laláhe, aniléka mu tin, tsúfé oma anito.”

³⁹ Táme Yesu lébláa amú obéé, “Mlimáka mu itin! Tsúfé ohaa má invá obóbwe ofúla mí dátó, lábli mí iwí asun laláhe. ⁴⁰ Tsúfé oha ání omakusó líi anisu buo ani. ⁴¹ Onakwali nde mli bláa mbéé, ní oku oha mli ntsu-owebi mlonu, mí dá ání idin mlisu su á, omóhulí mu ipán.

Oha Kpa Wá Lakpantó
(Mateo 18:6-9; Luka 17:1-2)

⁴² “Ní oku léha ahá ání bomakódan mísú hógyito ánfito oku lóbwe lakpan á, ní beda nfúokwebu sían mu ometo, tswi mu wá oputo pó á, ibu alé dun.
⁴³⁻⁴⁴ Ní fú ibi kule téhá fótobwé lakpan á, ka mú le! Ibu aléá fópu ibi kule nyá nkpa ání itamatá, dun ání fópu ibi anyo wíé isubití ogyá ání itamaduntó.†
⁴⁵⁻⁴⁶ Ní fú yabi kule téhá fótobwé lakpan á, ka mú tswi tsalífwí! Ibu aléá fópu yabi kule nyá nkpa ání itamatá, dun ání fópu ayabi anyo wíé isubití

† **9:43-44** Mótó yée 44 móa 46 belian 48, táme uma nwoló dada amu akoto.

ogyá ání itamaduntá.‡ 47 Ní fú nsibi téhá fótábwé lakpan á, loti mú le. Ibv aláá fópυ nsibi kole wíé Bulu iwíegýí ámυtá, dvn ání fópυ ansibi anyá wíé isubítí ogyá ání itamaduntá. 48 Ɖtínéá inυ anyambi bvtamawú, inυ ogyá é itamadun.

49 “Tsúfé bópυ ogyá tin áhagyíáha iwí, fé alíá bvtápú nfóli tin afódie iwí.

50 “Nfóli bv ádwε, táme ní itá ádwε á, ntá bélépówá mú ádwε?

“Mlíha ádwε itsia mlítá fé nfóli, iwílwii itsia mli mli aba nsiné.”

10

Ɖkákíná Iwí Atosunáhé (Mateo 19:1-12; Luka 16:18)

1 Yesu lókυsú tsú inυ yó Yudea ámátó, Yordan ntsu ábun. Ɖám be trá be fia bomlí mv, ále trá suná amó ató fé alíá átbwé yáí.

2 Farisífo akυ beba mv wá, bυdekléá bósá mv kí. Mú sv be fité mv beε, “Aní Mbla leha ákpa ání oyin ábétalí kíná mv ka?”

3 Yesu léfité amó ábéε, “Nkálí aní náin Mose lówa mbla há mli?”

4 Be le mv áno beε, “Mose léha ákpa ání oyin áwánlun ákákíná áwulú púkina mv ka.”

5 Yesu lébláa amó ábéε, “Mli kluntá-odwin sό Mose lówanlín mbla ánfí há mli. 6 Tsú bréá Bulu léle áyí á, átsi móa oyin álbwε. 7 Iní sv oyin obótu sí mv si mva mv yin yémantá mv kasυ, 8 amó abanyó bóbwε áyulú kole ní. Bvtráa bυmegýí abanyó, mboún babwé ábakúle. 9 Iní sv áhá ání Bulu labwé amó ikule a, áhaa mámain amó abasυ.”

‡ 9:45-46 Mótó yée 44 móa 46 be lian 48, táme ima nwuló dada amυ akotá.

10 Bréá beyinkí ba wóyító a, Yesu akasípó amu be trá fité mu asón tsú asón ánfí iwí. 11 Yesu lébláa amó òbée, “Ní oyin okíná mu ka láyétsiá ɔtsi bámbá á, alató mbua. 12 Alí kén ní ɔtsi okíná mu kulu láyétsiá oyin bámbá á, alató mbua ní.”

Nyebi Yulá

(Mateo 19:13-15; Luka 18:15-17)

13 Aha aku be kpa nyebí ba Yesu be, ɔpúu ibi dínka amósó, táme mu akasípó amu bowa iyin wá amó. 14 Bréá Yesu lówun a, òbló lekítá mu. Múu òlebláa akasípó amu òbée, “Mliha nyebí ámu ɔkpa abuba mí wá. Mlímátin amó ɔkpa, tsúfé ahá ánfí odu bó Bulu iwíegýí ámu ní. 15 Ɔnɔkwali nde mli bláa. Ɔhá ání ɔmɔhɔ Bulu iwíegýí amu fé kebi á, omóowíe mútá.” 16 Múu òelatá amó pútá, pú ibi dínká amósó, oloyulá amó á.

Atonyahé Iwí Atosundhé

(Mateo 19:16-30; Luka 18:18-30)

17 Bréá Yesu lópu ɔkpa ɔyó á, oyin ɔku lésrí ba be da akpawunu mu ayabito fité mu òbée, “Osunápó yilé, ntó nóbwe asa nénya nkpa ání itamatá?”

18 Yesu léfité mu òbée, “Ntogyi só fude mí ti ɔha yilé? Ɔhaa mégyí ɔha yilé, nkéti Bulu nkule. 19 Yéé fuyin Bulu mbala ámu dodo? Ɔbée, mámɔ ɔha, máto mbua, máwi ató, máka asón dínká fú bású, másisií ɔha, bu fú sí mu fú yín.”

20 Oyin ámu lébláa mu òbée, “Osunápó, tsú mí nyebito ɔpá nde ínì féesú gyí.”

21 Yesu léki mu díín, mu asón lɔwa mu ɔdwe. Múu òlebláa mu òbée, “Úasí tokukuleá fóbwe. Yefe fú iwísu ató féé, afoye kóba amu ha ahiánfɔ, ménì fénya siadié ɔsúsú. Fɔbwé mú tá á, ba afubobuo mi.”

22 Bréá oyin ámu lónu asón ánfí á, ɪwɪ lowu mu. Mú su ɔlenatí díín, tsúfɛ ɔhíé ɔbu ató.

23 Yesu lékɪ bomlí, ɔlebláa mu akasípó amu ɔbéɛ, “Tbéhie wá ɔnlɪn asa ɪwɪ onyapó obówie Bulu iwíegyí ámutɔ!”

24 Bréá akasípó amu bonu asón ánfí á, ɔnó lobwie amú. Táme Yesu lélabláa amú ɔbéɛ, “Mí abí, Bulu iwíegyí ámutɔ wie ɪbéhie wá ɔnlɪn! 25 ɪɔpɔn ha kpósó ání ɔbótɔn ɔbɪn-atɔ ɔbótó, dón ání ɪwɪ onyapó obówie Bulu iwíegyí ámutɔ.”

26 Asón ánfí leha ɔnó lehie bwíé amú. Mú su befité aba beɛ, “Mómú ma meɛ Bulu ɔbóhɔ nkpa?”

27 Yesu lékɪ amú díín, ɔlebláa amú ɔbéɛ, “Tóá ɪɔn nyankpɔsa bwe mɔdón Bulu, tsúfɛ Bulu mú tetálí bwé tógyító.”

28 Mú Petro lébláa mu ɔbéɛ, “Yéɛ anɪ mú anɪasí tógyító tswɪ bobuo fu o!”

29 Yesu lébláa mu ɔbéɛ, “Ɔnɔkwali nde mli bláa. Ɔhagyíoha ání olesi mu wóyí, mu apíó, mu sɪ mva mu yin, mu abí ntée mu ɔsulúv ɔmagyáa, mía mí ason wankláán ámu su á, 30 ɔbélanyá mu wóyí, mu apíó, mu ayín, mu abí pú mu agyapadiɛ ámu odu tsé lafa séi. Bédunká musu é séi, táme obénya nkpa ání itamatá bré ámúú ɪbá ámutɔ. 31 Táme agyankpapu tsɔtsɔtsɔ béba bemlí amapu, amapu é béba bemlí agyankpapu.”

*Yesu Lowu ɪwɪ Asón Blí Otse Saasi
(Mateo 20:17-19; Luka 18:31-34)*

32 Yesu mva mu akasípó amu bɔpu ɔkpa bɔyó Yerusalem wúlutɔ, Yesu gyánpká. ɪɔwa amú wánwan, ifú lekítá ahá ámúú bobuo amú ámu. Múú ɔlekpa akasípó dúanyɔ ámu ya ɪtsétó, ɔletrá bláa amú tóá ɪbéba musu. 33 Ɔbéɛ, “Mlɪnu! Ní awíé

Yerusalem a, béle mí, Nyankpɔsa-Mɔ-Bi ánfɛ há Bulu igyí ahapó dehen pó Mose mbɔla asunápó. Béha mí lowu ipón, pó mí wá ahá ání bomegyí Yudafɔ ibitɔ. ³⁴ Bóbwe mí ahinlá, tú atsunó wólí mí, nwén mí mɔlɛ, mó mí, táme eke sáásí a, Bulu obókɔsúa mɛ tsú afúlitɔ.”

*Ɔhande Osúm Mv Aba
(Mateo 20:20-28)*

³⁵ Sebedeo abí Yakobo mɔva Yohane bɔkpɔkpé mantáa Yesu bláa mɔ beɛ, “Osunápó, anɔdékléa fɔbwéɛ tɔku ha anɔ.”

³⁶ Mú Yesu léfité amó obéɛ, “Ntɔ mlɔdéklé mlɔaa mbwéɛ ha mɔ?”

³⁷ Bebláa mɔ beɛ, “Ha anɔtɔ ɔkɔle otsia fú gyɔpɔsɔ, ɔkɔle é otsia fú binasɔ bréa Bulu ɔwá fú numnyam.”

³⁸ Táme Yesu lébláa amó obéɛ, “Mlɔmégɔn tɔá mlɔdékɔlɔ! Mlétalí wun iwɔsɔn amóú nebá bowun amɔ, ntée mlétalí wú lowu amóú nówu amɔ?”*

³⁹ Bele mú ɔnɔ beɛ, “Ee abétalí.”

Mú ɔlebláa amó obéɛ, “Mlówun iwɔsɔn amóú nebá bowun amɔ, wú lowu amóú nówu amɔ é, ⁴⁰ táme mma túmɛ ání néle ɔhá ání obétsiá mí gyɔpɔ ntée binasɔ. Alɔ otsiákpá anfi mú ida gyo ahá amóú Bulu lalá inɔ yáí há amɔ.”

⁴¹ Bréa akasípó idú atráhe amɔ bonu asón ánfɛ á, Yakobo mɔva Yohane iwɔ lówa amó oblɔ. ⁴² Yesu létɔ amó féé ba mɔ iwɔ wá, ɔlebláa amó obéɛ, “Mlɔyin ání ahá ání bɔtobú amóá bɔgyi ɔmátɔfɔsɔ agyípó bɔtehíé amó ahá, amó ahande é bɔtenyá túmɛ amósó. ⁴³ Táme mlɔtɔ mú á, umába alɔ. Ɔhá ání odekléa obóbwe mlɔtɔ ɔhande obwéɛ mɔ féé ɔkpábi.

* **10:38** Mlétalí wun iwɔsɔn ... wú lowu amóú nówu amɔ? Ntée Mlétalí nu ntá nebá bonu ntée há bóbɔ mɔ asú amóú nebá bóbɔ amɔ?

44 Ní mlitɔ ɔku é dékléá ɔbɔbwe mli nkpa ogyápu a, ɔbwée mli fée ɔkpábi. 45 Tsúfè mí, Nyankpusa-Mu-Bi ánfɛ é mmeba mbée, busúm mí. Ahá osúmkrá neba, ampu mí nkpa hɔ ahá tsɔtsɔtsɔ nkpa.”

Ansibi Obwiepú Ɔku Ilo Tsa

(Mateo 20:29-34; Luka 18:35-43)

46 Boyówie Yeriko wúlutɔ. Bréá muva mu akasípú pú ɔɔm kɔnkɔnkɔnkɔntɛ ámú búbuo mu amu búdedali inu á, bowun Timeo mu bi Bartimeo. Mu ansibi labwíé, otsie ɔkpatɔ ɔde ató kulí. 47 Bréá olonu ání Yesu Nasaretyin amu détsúun a, ɔlwa kplón bi ɔbé, “Anɛ Wíe Dawid mu na Yesu, wun mi nwe!”

48 Amútɔ ahá tsɔtsɔtsɔ bɔkplón wa mu be, ɔkpá ɔnɔ bun, táme mu mú ɔlelakplón dun ali ɔbé, “Anɛ Wíe Dawid mu na, wun mi nwe!”

49 Yesu lési lí, ɔlebláa amú ɔbé, “Mlitɛ mu ha mi.”

Bokpolí ansibi obwiepú ámu, bebláa mu be, “Fú klon idí fú asi, afokusu ba. Ɔde fú ti!”

50 Inu oyin ámu lótswi mu ɔsúsó atadie tsálífwí, wáan kusó ba Yesu wá.

51 Yesu léfité mu ɔbé, “Ntɔ fudeklé fɛɛ mbwée ha fu?”

Inu ansibi obwiepú ámu lébláa mu ɔbé, “Os-unápú, ha mí anwun ató!”

52 Inu Yesu lébláa mu ɔbé, “Nati, fú hógyi latsá fú ilo.”

Inunu mu ansibi lobwií, ɔlekplá buo Yesu.

11

Bɔhɔ Yesu Fɛ Owie Yerusalem

(Mateo 21:1-11; Luka 19:28-40; Yohane 12:12-19)

¹ Bréá bowie Betfage móa Betania, awúlu ání ìbù Nfò-nyíbu ámu* asi, batá Yerusalem wie tá á, òlwa mu akasípú abanyó gyankpá. ² Ọbée, “Mlìyò wúlu anfí ìda mlì ansító ánfító. Ní mlowíe wúlu amu ọ́nó á, mlówun afrímú kanáhe ọ́kú da ọ́fétó, ọ́haa mókótsiá musu kí. Mlìsankì mu, amlìkpa mu ba mí. ³ Ní ọ́kú ọ́fíté mlì ọ́bée, ‘Ntogyi sọ mlídé mu sankí?’ á, mlìbla mu mlìaa, ‘Anì Wie dé mu hián. Obéyinkía mu ba séi.’ ”

⁴ Bọyò á, bọyòtu afrímú ibí ámu da ọ́fétó wóyí ámu ọ́nó ọ́kpabáí. ⁵ Bréá buđe mu sankí á, aha akvá bulí ìnu befíté amú bee, “Ntogyi sọ mlídé afrímú ibí ámu sankí.”

⁶ Bele mú ọ́nó alì ámuú Yesu lébláa amú ámu pépéépé. Besi amú; akasípú amu besankí mú. ⁷ Bekpa afrímú ibí ámu ba Yesu. Beyaí amú atati dínká musu, ọ́lọ̀du bian musu. ⁸ Amótó ahá tsòtsòtsò beyaí amú atati tswì ọ́kpatò, akú é bebiabía afitáa bunbun ọ́kpa ámusu. ⁹ Ahá ámuú bọgya Yesu nkpá móa ọ́ma amu bọsúrà okitikítì bee, “Hosiána! Bulu oyúla ọ́há anfí ọ́bá anì Wie dátó anfí! ¹⁰ Bulu oyúla anì náin Dawid iwíegyí ámuú ìbá ámu! Hosiána bu ọ́súsúsú!”

¹¹ Bréá Yesu lówie Yerusalem a, ọ́lọ̀yò Bulu ọ́tswékpá, ọ́lwa ansí kí tógyító wunsínésú ìnu wan-kláán. Owí lapòn. Mó su muu mu akasípú dúanyò ámu beyinkí yó Betania wúluto.

Pòntò Oyí Lwú
(Mateo 21:18-19)

¹² Ọ̀yì kẹ̀hẹ̀ bréá beyinkí tsú Betania bebá á, akún de Yesu. ¹³ Olowun pòntò kvá ìlahíe pọ́í sísí, ìlú

* **11:1** Nfò-nyíbu igyi obubwí kvá ìbù mantáa Yerusalem, bọ̀tétí mú Olifbù.

mantáa akpa. Olwo yéki bee obénya ku mótó. Táme olowie mó asi á, afitáa sóón bu músú, tsúfé oyí ámu swiebí makófun. ¹⁴ Inu elebláa oyí ámu obéé, “Tsú nde pýa a, ohaa méétrá gyi fú abi swiehé.”

Mu akasípó amu é bonu asón áñfi.

Ibia Agyípó Gyáa Le Bulu Otswékpa Wunsínésó
(Mateo 21:12-17; Luka 19:45-48; Yohane 2:13-22)

¹⁵ Bréá bowie Yerusalem a, Yesu lóyo Bulu otswékpa wunsínésó. Inunu olwa ató afeputó pú ató ahópu amu aná féé gyáa dali inu bi. Olowuwíta kóba atsépu mpónú dá, súnsunki abróðuma afeputó mbíá dá. ¹⁶ Omeha ató afeputó okuku osura mu ató fehé ka tsun Otswékpa wunsínésó inu kóráá. ¹⁷ Olosuná amú ató obéé, “Bumowanlín wá Bulu ason wanlínhé amuto bee, ‘Béti mí otswékpa bee, omá féé mpái obokpá?’ Táme mlilapú inu mlí awikplu ohaínkpá.”

¹⁸ Bréá Bulu igyí ahapú dehen pú Mose mbla asunápó amu bonu tóá alabwé á, bodunká akpa ání bótsun músú mó mu. Benya ifú, tsúfé mu atosunáhé amu leha onó lobwie odam amu.

¹⁹ Bréá owí ləpən a, Yesu muva mu akasípó bedali wúlu amuto.

Hógyi Iwi Atosundhé
(Mateo 21:20-22)

²⁰ Bréá budetsúun nyanki a, bowun ání pəntə oyí ámu ilawú tsú mó osú beyi asi. ²¹ Inu Petro lékaín asón ání Yesu lébláa pəntə oyí ámu. Múú elebláa Yesu obéé, “Osunápó, ki, pəntə oyí ámúú fəlwí ámu ilawú!”

²² Yesu lébláa amú obéé, “Mliho Bulu gyi. ²³ Onokwali nde mli bláa, ohagyíoha ání obébláa ibo áñfi obéé, ‘Púli yowie aputo’, omegyí nwéen mu

klontɔ, olohogyi ání asón ámóú mablí ámu íbéba mótɔ á, íbópulí yó. ²⁴ Iní sɔ nde mli bláa mbéé, tógyítá mlɔkólí Bulu á, mlihogyi ání mliányá mú dodo. Mli íbí bédá mú. ²⁵⁻²⁶ Ní mliíí mliédé mpáí bɔ, ɔkɔ asón bu mli klontɔ á, mlisi ɔhá ámu lakpan kie mu, méní mli Sí ámóú ɔbu ɔsósú ámu é obésí mli klé kíé mli.[†]

*Yesu Túmi Iwí Asɔn Fítéhé
(Mateo 21:23-27; Luka 20:1-8)*

²⁷ Yesu mɔa mu akasípó amu betrá yinkí ba Yerusalem. Bréá ɔna odeki Bulu ɔswékpa wunsínésó mu á, Bulu igyí ahapú dehen, Mose mbla asunápó pó Yudafo ahande amu beba mu wá. ²⁸ Befité mu beé, “Túmi mɔmu fúdepuwé ntobí áñfi? Ma léha fú túmi ámu?”

²⁹ Yesu lélé mú ɔnó ɔbéé, “Nfíte mli asɔn kua kɔle. Ní mliélé mú ɔnó há mí á, mí é nébláa mli túmi oduá ndepuwé ntobí áñfi. ³⁰ Bulu wá Asú Ɔbɔpú Yohane lénya túmi póbó ahá asú lóó, ntée nyankpɔsa? Mlibla mi!”

³¹ Amó wɔlewɔle bɔyɔ asón áñfitɔ beé, “Ní ablí aniaa itsú Bulu wá á, ɔbéfité aní ɔbéé, mú ntogyi sú mliómóhɔ mu gyi? ³² Ntée ablí aniaa itsú anyánkɔpɔsa wá?” Táme bɔde ahá ámu ifú nya, tsúfé amó fée bohogyi ání lélé Bulu ɔnósú ɔtáipú onutó Yohane gyi. ³³ Mú sɔ bele mú ɔnó beé, “Ohwée! Anímeyín ɔtínéá olenya mu túmi tsú.”

Móú Yesu é lébláa amó ɔbéé, “Mómú mí é mméébláa mli túmi oduá ndepuwé ntobí áñfi.”

[†] **11:25-26** Mótɔ yée 26 bu nwołó dada amu akotɔ: Táme ní mlihésikíé ahá a, mli Sí ámóú ɔbu ɔsósú ámu é oméesikíé mli.

12

Apafɔ Laláhe Aku

(Mateo 21:33-46; Luka 20:9-19)

¹ Yesu lówa amú asón bláa ayébitɔ bi. Ɔbée, “Oyin ɔku lódo wáin ndo. Olegyi iban bómlí mú. Olokwi wáin amu onyimékpá, ɔlɔpwe obu fóáhé ku há ndo ámu agyópu. Mú ɔlɔpu ndo ámu wá apafɔ ibitɔ, olotu ɔkpa. ² Bréá wáin-abí ámu kpɔtíbi lɔfon a, ɔlɔwa mu osúmpú apafɔ ámu wá ɔbée, ɔyóho mu ogyíkpa ba mu. ³ Táme apafɔ ámu bekitá mu, dá mu, gya mu sísí ibikpan. ⁴ Ndo mu wie amu létrá wa mu osúmpú nyɔɔsi amú wá. Apafɔ ámu beda mu é, pílan mu nwuntɔ, sɔpa mu. ⁵ Ɔletrá lawá ɔbambá. Mu mú á, bɔmɔ mu. Alí kén bɔbwe atráhe é ní. Beda aku, mó aku é. ⁶ Ilesi mu onutó mu bi ɔkule péá ɔtamatsúlá musu. Ɔki ɔbée, bɔbu mu mú. Mú su ɔlɔwa mu é. ⁷ Táme apafɔ ámu beblí beɛ, ‘Ɔni obégyi mu si ató ní. Mliha amɔ mu, méní ndo ámu ibémlí aní klé.’ ⁸ Mú su bekitá mu, mó mú, tswi mu dáli ndo ámutɔ.

⁹ “Ɛkeá ndo mu wie amu ɔbá á, ntɔ mlilahogyi mlíaa ɔbɔbwe apafɔ ánfí? Ɔbéha bɔmɔ amú. Ɔbélapú ndo ámu wá apafɔ bámbá ibitɔ. ¹⁰ Ntée mlímókókla Bulu ason wanlínhé amu kí? Bɔwanlín beɛ, ‘Ibwi ámutú obu ayípu bekiná ámu lébemlí okonkísóbwi ní.

¹¹ Bulu lóbwɛ mú alí.
Ibɔ wánwan.’”

¹² Inu Yudafo ámu bekleá békitá Yesu, tsúfé bebi ání amú su alahá yébi ánfí, táme bode ɔdom amu ifú nya. Mú su benatí sí mu.

Lampóoka

(Mateo 22:15-22; Luka 20:20-26)

13 ɔma a, bɔwa Farisifo pú Owíe Herode ahá beε, buyétetéε Yesu ɔnótó asón nu, abonya mu akitálé.

14 Bréá beba mu wá á, bebláa mu beε, “Osunápó, anyin ání ɔnɔkwaliɔ fuyi. Fɔtamahá ɔhaa ɔtse fú agywuɔn, tsúfé fɔtamaki ɔhaa ansító. Mboún Bulu asón ámúbú igyi ɔnɔkwali amu fɔdesuná. Mú su anidé fú fité anu. Aní mbla leha ɔkpa ání akáa lampóo ha Roma owíe dehen Kaesare, ntée animáka?”

15 Yesu lébɔ ání buki ansí. Mú su ɔlefíté amú ɔbéε, “Apinabwεbí abwεpú, ntogyi sú mlidé mí sɔɔ ki? Mlitsu kóba amu ikɔ ba mi anki.”

16 Bɔpɔba mu. Múbú ɔlefíté amú ɔbéε, “Ma nwun pú mu idá dín mósú?”

Bele mú ɔnó beε, “Kaesare.”

17 Múbú ɔlebláa amú ɔbéε, “Mómú mlɔɔ tɔá igyi Kaesare klé ha Kaesare, amlɔɔ múbú igyi Bulu klé é ha Bulu.”

Mu iwɔ lówa amú ifú.

*Kɔsú Tsú Afúlitɔ Iwɔ Asɔn Fitéhé
(Mateo 22:23-33; Luka 20:27-40)*

18 ɔpasua kwá butetí mú Sadukifo aku beba Yesu wá. Bɔgyi ɔpasua kwá buteblí beε, kɔsú tsú afúlitɔ ma mu. Befíté mu beε, 19 “Osunápó, Mose lówanlín tswɔ aní ɔbéε, ‘Ní ɔku muɔ mu ka bɔmɔkwí asa olowu sí mu ka ámu a, mu pio otsú mu ka ámu tsia, féki ɔkwu ha owupó ámu.’ 20 Oyin ɔkɔle abí abasiénó aku betsiá. Amótó ogyankpapu létsiá ɔká, táme ɔmɔkwí asa olowu. 21 Mu gyama lótsu ɔsɔrapɔka amu tsia, táme mu é ɔmɔkwí. ɔsaasi lótsu ɔtsi ámu tsia. Mu é ɔmɔkwí. 22 Alu yótɔ osienósí amu. Amótó ɔkokɔ mókwi asa olowu. ɔma-ɔma a, ɔsɔrapɔ amu é lóbowu. 23 Afúli ɔkɔsúké a, amótó

omomuo obóbwe mu kulu? Tsúfè amó abasiénó ámu fée betsiá mu.”

²⁴ Mú Yesu léle mú onó obée, “Megyí mli ológyi. Mluméyín Bulu asun wanlínhé amu ntée Bulu túmi.

²⁵ Tsúfè ní afúli bakósó á, bóbwe fé Bulu-abəpu. Buméetsiá aká móa akúlu. ²⁶ Táme afúlikosó iwí mó á, yée mlilakla Mose əwəlo, nú asón amóú Bulu lébláa mu dimbísú bréá olowun oyibi ku de ogyá tsií, táme imedéhóo amu? Obée, ‘Mígyí mli anáin Abraham mwa Isak pú Yakob Bulu ámu ni.’ ”

²⁷ Inu əlebláa amó obée, “Megyí awupó Bulu ógyi, akiankrapu Bulu ógyi. Mli mó mlilafwí fée.”

*Bulu Mbla Amotə Móa Idon
(Mateo 22:34-40; Luka 10:25-28)*

²⁸ Mose mbla asunápó amotə əkəle ləbətə amó inu, olonu asón ání budəbití. Olowun ání Yesu lalé Sadukifə ámu asón onó wankláán. Mó su əlefíté Yesu obée, “Bulu mbla ámotə momu dön?”

²⁹ Yesu léle mú onó obée, “Bulu mbla ámotə móa idon ni. ‘Israelfə, mlinu. Bulu əkəle pé aní Wíe Bulu gyí. ³⁰ Mó su pu fú klən, fú əkláa, fú agywun pú fú əwənlín fée dwə fú Wíe Bulu.’ ³¹ Mó nyəəsi é gyí, ‘Dwə fú bá fé fú iwí.’ Mbla kuku itráa ma inwá idon iní.”

³² Mbla osunápó amu lébláa Yesu obée, “Osunápó, fablí əəkwalí. Aní Wíe Bulu nkəle pé bu inu, əkəku trá əma inu. ³³ Apú aní klən, aní agywun pú aní əwənlín fée dwé mu, adwə aní aba fé aní iwí. Idon mbwí tóhé pú afədíe kugyíku.”

³⁴ Yesu lówun ání alabí lé asón ámu onó wankláán, əlebláa mu obée, “Foma ifó Bulu iwíegyí ámotə.”

Mó əma a, əhaa métrá wa klən fité mu asəansu.

*Ma Gyi Kristo Amv?**(Mateo 22:41-46; Luka 20:41-44)*

³⁵ Bréá Yesu dé ató suná Bulu ɔtswékpa nwnunsínésú ɪnv á, ɔlefíté ɔbée, “Nkálí sù Mose mbla asunápó amv betalí blí bεε, Owíe Dawid mv na gyí Kristo, (ɔhá ámú Bulu léda mv ofúli amv)? ³⁶ Tsúfé Ɔηε Wankíhé léha Owíe Dawid onutó léblí ɔbée, ‘Aní Wíe Bulu lébláa mí Wíe ɔbée,

“Tsia mí gyɔpɪsv nfi

yɔfon bréá néha fétsatsáa fú alupós.” ’

³⁷ Owíe Dawid onutó létí mv ɔbée mv wie. Nkálí sv ɔtráa ogyí mv na?”

Asún ánfi lówa ɔɔm kpɔnkpɔɔnkpɔntɪ ámú be-fia bomlí mv amv ɔɔwe, bɔpv ansigyí nú mv asún.

*Mose Mbla Asunápó Tsiátó**(Mateo 23:1-36; Luka 20:45-47)*

³⁸ Yesu léblí mv atosunáhé amɔtɔ ɔbée, “Mhíkɪ wankláán Mose mbla asunápósv. Bvtekle ligá wa náti kí, bvtekle bεε, ahá bɔbún ha amú itsiá dɪnsv. ³⁹ Otsiákpá yilé bvtekle tsiá Yudafɔ ofiakpa pú nke ogyíkpá. ⁴⁰ Bvtesísi asvrapv, swíi amú amú wóyí. Bvtepiná bɔ mpái tɪntíntín ahátɔ póbun amú lalahεsv. Bulu ɔbébití amú ɪsv kínkíínkín!”

*Ɔsvrapv Ɔkv Tswitswɪ**(Luka 21:1-4)*

⁴¹ Yesu létsiá mantáa tswitswɪ dáka Bulu ɔtswékpa ɪnv, ɔɔe ahá kí bvdεpv amú tswitswɪ bɔwa mótó. Ahá ání amú ɪbɪtɔ bv odwin bvdεpv kóba akpɔnkpɔntɪ bɔwa. ⁴² ɪnv ɔsvrapv ɔkvá ɔma tɔtɔ é lópυ mv kóba-ana bɔwa dáka ámɔtɔ. ⁴³ Mú ɔletɪ mv akasípú amv ba mv wá, ɔlebláa amú ɔbée, “Ɔnɔkwali ndε mli bláa, tswitswíá ɔsvrapv anfi ɔma tɔtɔ lawá á, ɪɔvɪn ɔhagyíɔha klé. ⁴⁴ Tsúfé atráhe amv

fée á, amó kóba tsòtsòtsòto balé kpalobí tsú bowa. Táme íniá òsurapu anfi mú má tòto su tóá òbu fée alapó bowa á.”

13

Bulu Òtswékpa Amu Bwie (Mateo 24:1-2; Luka 21:5-6)

¹ Bréá Yesu lédali Bulu òtswékpa wunsínésó inu òyó á, mu akasípú amòto òkòlè lébláa mu òbéé, “Òsunápó, kí mbu wankláán pú abwi akpònkpònti ánfì bòpuyi mú ánfì akíle!”

² Múú òlebláa mu òbéé, “Yéé fawun mbu akpònkpònkpònti ánfì? Bóbwie mú fée bun. Ibwi kòlè kóráá méesian ònká mú básó.”

Iwòsun Múá Ìkplán (Mateo 24:3-14; Luka 21:7-19)

³ Bréá Yesu tsie Nfò-nyíbu ámòsu, òde Bulu òtswékpa mbu ámu kí a, Petro, Yakobo, Yohane mu Andrea nkòlè bẹfité mu bẹe, ⁴ “Bla anì, bré mòmòto ínì fée béba? Osúna mòmò é òbéba, ibòsuná anì mú bré lafun?”

⁵ Inu Yesu lébláa amó òbéé, “Mlíki wankláán, ménì òhaa méemlé mlì. ⁶ Ahá tsòtsòtsò bòpu mí dá ba bẹe, amúgyí Kristo amu ni. Bémlé ahá tsòtsòtsò bófwi òkpa. ⁷ Ní mlonúá isá ladá mantáa mlì ntée òtínkò á, opúni mátsií mlì Tsúfé lehián anì ínì aná fée béba, támé imedésuná anì òyí ònómòké ámu lafun. ⁸ Tsúfé òmá bókò aba. Awíe bókòsú líí abasu. Òsolúb békpínkí ntíné-ntíné. Akún é béba. Inì fée igyi fé iwòsun anì òtsi towun bréá ikwí de mu dwiín.

⁹ “Mú su mlì mú mlíki mlì iwí wankláán. Tsúfé mí su bòpu mlì há Yudafò asón agyípó, béda mlì amó ofiakpa awúlu-awúlusu. Békpa mlì ya òmású

agyíró pú awíe ansító, méní mlégyi mí iwí adánsi. ¹⁰ Táme ilehián ání bégyankpá dá asun wankláán ámu okan súná oyító ahá fée. ¹¹ Ní bekítá mli ya a, mlimágywíun asún ání mléblí. Mlibli asóngyiasún ání Bulu obópúwá mli onó alí bré ámúto. Tsúfè megyí mli onutó obótóí, Oje Wankíhé obótóí tsun mli su.

¹² “Apíó béle amó apíó há lowu. Abí así béle amó abí há. Abí é bókúso líí amó akwípúsu, há bómó amó. ¹³ Mí su ahá fée bólu mli, táme ní mlétalí wá klon líí kinkíinkín yófun mú onómó á, Bulu obóho mli nkpa.

Iwíwíwí Wúunbí

(Mateo 24:15-28; Luka 21:20-24)

¹⁴ “Táme ní mlowun akisítóá itobwíé omá, ida otínéá mlimédín ansí ání íbéba a, (aklápú, mlinu mó así.) Mómó ahá ání bobu Yudea omátó busri yo abusu. ¹⁵ Ohá ání odín obusu mákpli botsu toto obuto! ¹⁶ Ohá ání obu ndoto é máyinkí botsu mu tati. ¹⁷ Amenyapú pú abí-ayín ání bupia abi bóbwe alí bré ámúto, bogyówí ní! ¹⁸ Mlikokoli Bulu mliaa, mli osríké amú imábwe nyankpú múa atsalibí. ¹⁹ Tsúfè asun wunhe ání íbéba alí bré ámúto odu makóba tsú bréá Bulu lóbwe oyí opá kí. Mú odu kúku é imétrá ba ekekéke. ²⁰ Ní Bulu médínkí nke ámusu á, tekí ohaa méesian oyító. Táme ahá amúó alalé púbwé mu kle amú su aladínkí nke ámusu.

²¹ “Alí bré ámúto á, ní oku lébláa fu obéé, ‘Kí, Kristo, (ohá amúó Bulu ladá mu ofúli amú) bu nfi ntéé nána’ á, máhógyi. ²² Tsúfè ahá ání beé amúgyí Kristo amú pú ahá ání bówa afunu beé, Bulu onósú atóipú bogyi tsotsotsó béba oyító. Bóbwe ofúla pú osúna pómle ahá. Ní bétalí kóráá á, bémlé ahá amúó Bulu lalé

ámu é. ²³ Táme mlíkí wankláán! Nabláa mlí tógyító asa íbéba.

Nyankpɔsa-Mv-Bi Ámu Ibábi

(Mateo 24:29-31; Luka 21:25-28)

²⁴ “Íwɔsɔn wúun amu ɔma a, owí ɔbéta, ɔsra é ɔméetrá fée. ²⁵ Ntsrakpabi békpa tsú ɔsúsó beda. Nwɔlótáa móa mótó ató fée békpinkí. ²⁶ Ɔhagyíɔha obówun ání mí, Nyankpɔsa-Mv-Bi ánfí napó túmi móa numnyam kpɔnkpɔnti mbu nwɔlótáato tsú ɔsúsó neba. ²⁷ Inu Bulu ɔbówa mu abɔpu béyekpa mu ahá ámú alalé ámu tsú ɔyí afɔnka ana ámu féesó.

Ɔyí Ɔnómɔ Iwi Osúna

(Mateo 24:32-35; Luka 21:29-33)

²⁸ “Mlɔpɔki pɔntɔ ɔyí. Ní mú abámbi deɔɔí, ide ate pɔpwe le á, mlitebí ání awikpan bré lafɔn. ²⁹ Alí kén, ní mlowun ání ntobí ánfí fée ide mótó bá a, mlébi ání mí, Nyankpɔsa-Mv-Bi ánfí íbábi lafɔn ta ní. Nawíe wóyí ámu ɔnó tá. ³⁰ Ɔnɔkwali nde mlí bláa. Ndemba-abí anfi fée bɔmóowu tá, asa íni fée béba mótó. ³¹ Ɔsó móa asi fée bótson, táme mí asɔn blíhé móɔtsɔn ekekekeke.

Nyankpɔsa-Mv-Bi Ámu Ibábi

(Mateo 24:36-44)

³² “Táme ɔhaa méyín eke ntée bréá ntobí ánfí fée íbéba. Bulu-abɔpu bɔmeyín. Bulu mu Bi ámu é méyín, nkéti aní Sí ámú ɔbu ɔsúsó ámu nkɔle pé yin. ³³ Mlɔdɔnka ansí íwɔsɔ, tsúfé mliméyín ekeá bré ámu íbɔfɔn. ³⁴ Igyi fé ɔkɔá ɔde ɔkpa tu, olesi mu wóyí wá mu asúmpó íbitɔ. Ɔleha okugyíɔku agyómá ɔbéé ɔbwéé. Ɔlebláa wóyí ámu ogyópu é ɔbéé, ɔyírí íwɔ ogyo wóyí ámu wankláán. ³⁵ Mú sɔ mlɔdɔnka ansí íwɔsɔ, tsúfé mliméyín bréá wóyí mu wie amu ɔbéba.

Fíali ntópwe o, oyí-nsiné o, baka o, ntée nyanki.
³⁶ Mlídinka ansí iwísu, ménì obá bofwie mlítò á,
 omabotu mlì ání mlíladídì. ³⁷ Asón ánfì nde mlì bláa
 anfi kén nde oyító ahá fée bláa. Mbée, ‘Mlídinka ansí
 iwísu.’ ”

14

Bekiklú Yesu Nwunsu

(Mateo 26:1-5; Luka 22:1-2; Yohane 11:45-53)

¹ Ilesi nkenyó Yudafò abugyi Israelfosu Katsun Nke pú Bodobodo MátúhéNke. Alì bré ámotò Bulu igyí ahapú dehen pú Mose mbla asunápú bodunká okpa ání bótson músú kítá Yesu ñaintò, mó mu kokooko. ² Táme beblí beé, “Megyí Katsun Nke ánfítò abómò mu, ménì kpokiti méeda omá ámotò.”

Ofobí Fánfánfán Pwólí Yesu

(Mateo 26:6-13; Yohane 12:1-8)

³ Bréá Yesu bu Betania wúlutò, Simon okvá alaló ìlò pèpè kí wóyító òde ató gyí a, òtsì oku léba inu; òde prentwa wankláán kvá ofobí fánfán ání ìbu ibiá bu mótó. Oletíí mó ònó, òletsei ofobí ámu wólí Yesu nwuntò. ⁴ Aku bubu inwá imowa amú òdwe. Befité aba beé, “Ntogyi sù òde ofobí ánfì yintá? ⁵ Teki abétalí fè ofobí fánfán ánfì, mó ibiá bódun obakòle ofi okole ikaká ánfì, pùhá ahiánfò.” Behie wá iyin wá òtsì ámu.

⁶ Táme Yesu léblí obée, “Mlìsi mu! Ntogyi sù mlídé mu háan? Itò yilé alabwé há mí. ⁷ Ahiánfò bétsiá mlì wá ekekegyíeke. Brégyíbréá mlídéklé a, mlétalí wá awítòle há amú, táme mí mó mméetsiá mlítò yó. ⁸ Alabwé múá obétalí pólá mí oyulòw yáí há mí opuláké. ⁹ Onokwalì nde mlì bláa. Oyító

στίνε γιῶστίνεά βέδα Bulu ason wankláán ámu ðkan a, béblí tó áñfi ðtsi áñfi labwé áñfi pókáin musu.”

*Yuda Iskariot Lótsulá Aní ðbéle Yesu Há
(Mateo 26:14-16; Luka 22:3-6)*

¹⁰ Mú ðma a, mu akasípó dúanyo ámuto ðkoleá bütetí mu Yuda Iskariot lóyówun Bulu igyí ahapó ðehen amu, ménì ðbéle Yesu há amó. ¹¹ Bréá bonu asón áñfi á, ðehie wá amó ðdwe. Behie mu asi áñí béka mu ðkó. Mú su olodunká ðkpa áñí ðbótsun músó lé Yesu há amó.

Katsun Atogyihe Gyí

(Mateo 26:17-25; Luka 22:7-14, 21-23; Yohane 13:21-30)

¹² Bodobodo MátúhéNke ámuto eke gyankpapuá bütómó Israelfᵊsu Katsun Nke akúfa lófᵊn. Yesu akasípó befíté mu bee, “Osunápó, obu mᵊmutᵊ ayela ha fu, afᵊgyi Katsun Nketᵊ atogyihe amu?”

¹³ Mú ðlᵊwa amótᵊ abanyó, bláa amó ðbéle, “Mliyo Yerusalem wúlutᵊ, mléfla oyin ðkúá ᵊsu ntsu-óló, mlíbuo mu. ¹⁴ Wóyí oduátᵊ obówie á, mlífite wóyí mu wie amu mlíaa, ‘Nkónú afᵊó ᵊswíkpá bu, áñí mía mí akasípó abéba begyi Israelfᵊsu Katsun atogyihe amu?’ ¹⁵ Obósuná mlí abansúrᵊ yílé kuá balá mótᵊ yáí. Mlíbwe atᵊ ámu yai inu.”

¹⁶ Yesu akasípó amu bᵊyo wúlu amutᵊ á, bowun tᵊgyítᵊ alí amóú Yesu lébláa amó ámu pépéépé, bᵊbwe Israelfᵊsu Katsun atogyihe amu yáí inu.

¹⁷ Bréá nsaintᵊ deklúun a, Yesu muva mu akasípó beba inu. ¹⁸ Atᵊ ámu ogyíkpá a, Yesu lébláa amó ðbéle, “ᵊnᵊkwali nde mlí bláa, mlitᵊ ðkoleá mía mᵊnyo ðbi da ðlepetᵊ ðbéle mí há.”

¹⁹ Asón áñfi léhie han akasípó amu. Mú su befi asi bude mu fité ðkule-kule bee, “Mí ní lóó?”

²⁰ Yesu lébláa amó òbée, “Mli ahá dúanyò ánfítò òkubláa mía monyò ibi da òlepétò òbéle mí há ní. ²¹ Mí, Nyankpusa-Mu-Bi ánfí nówu fè alá bòwanlín tswi, táme òhá ámóò òbéle mí há ámu ògyòwi ní. Ní bometepí kwí mu kóráá á, tekí ibu alé há mu.”

Yesu Ntópwe Atogyihe Tráhe

(Mateo 26:26-30; Luka 22:14-20; 1 Korintofò 11:23-25)

²² Bréá bude ató ámu gyí a, Yesu léle bodobodo ipín, òleda Bulu ipán, bíábía mótó púhá amó, bí òbée, “Mliho, mí òyólóu ni.”

²³ Inu olotsu ntá-ewe, òleda Bulu ipán, púhá amó fée bonu. ²⁴ Múò òlebláa amó òbée, “Mí obugya ni. Mú Bulu dépusí mu ntam* ání alaká há ahásu ní. Bétseí mú wólí así ahá tsòtsòtsò lakpan su. ²⁵ Ònòkwali nde mli bláa, mméetrá nu wáin-abí ntá ánfí alu yòfon ekeá nónu mú pópwe Bulu iwíegyi ámutò.”

²⁶ Benya wá ibo dá Bulu ipán tá ali, benatí yó Nfò-nyíbu ámusu.

Petro Òbòswí Òbé Mvmeyin Yesu

(Mateo 26:31-35; Luka 22:31-34; Yohane 13:36-38)

²⁷ Múò Yesu lébláa amó òbée, “Mli fée mléyinkí mí òma. Tsúfè Bulu ònósú atáipú amu bòwanlín wá Bulu asón ámutò be, ‘Néda akúfa òkparú ámu lédá, mu akúfa bédasáin.’ ²⁸ Táme ní Bulu òkúsúa mi tsú afúlitò á, négya mli nkpa yó Galilea òmátò.”

²⁹ Petro lébláa mu òbée, “Ní amó fée beyinkí fò òmá kóráá á, mí mú mméeyinkí ekekekeke.”

* **14:24** Ntam pópwe bu nwolò dada amu akotò.

³⁰ Yesu lébláa mu óbée, “Ọ̀nọ̀kwali nde fú bláa. Onyeni, asa bate óbée ọ̀nó tse nyọ́ á, fọ́swí pú ibi wá ogyá tse sa fée fómeyín mí.”

³¹ Inu Petro léfin yabi yi óbée, “Ní lowu igyi kórará á, mméekíná fú ekekekeke.”

Alí kén atráhe amu é fée beblí ní.

Mpáibọ̀ Getsemane

(Mateo 26:36-46; Luka 22:39-46)

³² Boyówie ọ̀tınekvá bútetí inu Getsemane. Múu Yesu lébláa mu akasípó amu óbée, “Mlitsia nfi, nọ́yọ̀bọ̀ mpáí.” ³³ Ọ̀lekpa Petro muva Yakobo pú Yohane buo iwí. Inu asón lehié han mu, mu ansí lere. ³⁴ Múu ọ̀lebláa amú óbée, “Asón ihíé de mí háan. Ideklé mọ́ mí. Mlitsia nfi, amligyo.”

³⁵ Inu ọ̀lenatí yó nkpa kpalobí, ọ̀leda akpawunu kókóli Bulu óbée, “Ní ibówa alé á, ha bré ánfí itsun misu.” ³⁶ Múu ọ̀leblí óbée, “Abba† Mí Sí, fútetálí bwé tógyító. Ha ntá-ewe ánfí‡ itsun misu! Táme megyí t́á ndeklé, mboun móá fúdeklé ibá mótó!”

³⁷ Oleyinkí bá akasípó amu wá bowun ání búdedídi. Iní su ọ̀lefíté Petro óbée, “Simon, fúdedídi? Fumetalí gyo dọ̀nhwírí kule kpán?” ³⁸ Mligyo amlíkóli Bulu, méní mlímóowie isókító. Tsúfẹ́ ọ̀hé ámu déklé, táme nyankpọ́sa lópọ̀n.”

³⁹ Ọ̀letrá yọ̀bọ̀ mpáí, bláa Bulu asun kua kule amu kén. ⁴⁰ Ọ̀letrá yinkí ba bowun ání akasípó amu bútráa búdedídi, tsúfẹ́ didí de amú bu. Búmetalí bláa mu asuansu.

⁴¹ Bréá ọ̀leba otse saasi a, ọ̀lefíté amú óbée, “Mlilatráa si mlída mlídé ọ̀kpónó da? Itsía alí गया! Bré ámu lafọ̀n ání bópu mí, Nyankpọ́sa-Mu-Bi ánfí

† 14:36 ‘Abba!’ asi gyí, ‘Mí Sí!’ ‡ 14:36 Ntá-ewe ánfí igyi iwọ̀sin ání Yesu obówun.

wá lakpan abwεpú ibitɔ. ⁴² Mlikusu ayɔ. Mliki, ɔhá ámú ɔde mí le há ámu ná á!”

Yesu Kítá

(*Mateo 26:47-56; Luka 22:47-53; Yohane 18:3-12*)

⁴³ Yesu ɔnó mesi asa akasípú dúanyɔ ámotɔ ɔkoleá bɔtɛtí mu Yuda lóbowie mu. Ɔɔm ání buɔde ndayí pú nkpotí bubuo mu. Bulu igyí ahapú dehen, Mose mbla asunápú pú Yudafɔ ahande amu lówa amó.

⁴⁴ Yuda amú ɔlele Yesu há ámu lébláa ɔɔm amu yáí ɔbée, “Ɔhá ámú nɛlatá pútá ámu gyí ɔhá ámu ni. Mlikita mu kínkínkín, amlíkpa mu natí.”

⁴⁵ Inu ɔlenatí laa yó Yesu wá, yókpolí mu ɔbée, “Osunápú!” Ɔlelatá mu pútá. ⁴⁶ Inu ahá ámu benatí tó Yesu, kítá mu kínkínkín. ⁴⁷ Táme mu alípu ámotɔ ɔkole lótswi mu ɔdayí kpá Bulu igyí ɔhapú dehen osúmbi ɔku isu lé. ⁴⁸ Inu Yesu léfité amú ɔbée, “Ogyo otswapú ngyi, só mlilatsú nkpotí pú ndayí mlebá mí ɔkitákpá? ⁴⁹ Ntsie mli wá Bulu ɔtswékpa wunsinésú mu ekekegyíeke, nde mli ató suná, mlímékítá mí ekekekeke. Inu lahá Bulu ason wanlínhé amu ilaba mótó.”

⁵⁰ Inu mu akasípú amu féé besrí sí mu.

⁵¹ Ilesi ɔyasubi ɔkɔá ɔlɔwa ligá nkɔle. Bekítá mu, ⁵² táme ɔlɔkɔli, sí mu ligá ámu wá amú ibitɔ, pú yayá srí.

Yudafɔ Ahande Ansító Lú

(*Mateo 26:57-68; Luka 22:54-55, 63-71; Yohane 18:13-14, 19-24*)

⁵³ Bekpa Yesu ya Bulu igyí ɔhapú dehen wóyí. Igyí ahapú dehen, Mose mbla asunápú pú Yudafɔ ahande amu féé bafia mu. ⁵⁴ Petro lépetí buo amú ɔma tsútsúútsú, alu yówie wóyító mu. Inu oleyétsiá

inu asúmpó wá, ɔde ogyá núu. ⁵⁵ Inu Bulu igyí ahapú dehen pú Yudafo asón agyípu[§] atráhe fée bodunká ahá ání béka asón dínká Yesusu, méní bélií amó ason blíhésu mó mu, táme bumenya. ⁵⁶ Tsúfée ahá tsɔtsɔtsɔ bɔwa afunu dínká musu, táme amó fée ɔnó lɔtsɔn ɔtsan.

⁵⁷ Inu aku bɔkusú ká asón dínká musu bee, ⁵⁸ “Anílonuá ɔleblí ɔbéé, ‘Nóbwie Bulu ɔtswékpa anfi bapú ibi yi anfi, táme nkensá ɔma a, nélayi pópweá megyí nyankpɔsa ɔbópu ibi yi mó.’ ”

⁵⁹ Táme amó é amó ɔnó mɔbwe kule.

⁶⁰ Inu Bulu igyí ɔhapú dehen amu lókusú líí amó fée ansító, ɔlefíté Yesu ɔbéé, “Fuma ɔnó lé? Fuma asvansu blí pólé fó iwí?”

⁶¹ Táme Yesu méle asvansu ɔnó. Múú Bulu igyí ɔhapú dehen amu létrá fité mu ɔbéé, “Bulu ámúú bɔtekánfú ámu mu Bi gyí fú? Fúgyí Kristo, (ɔhá ámúú Bulu léda mu ofúli amu) ní?”

⁶² Yesu léle mó ɔnó ɔbéé, “Ee! Mí ní! Mlówun ání mí, Nyankpɔsa-Mu-Bi ání ntsie Bulu Otúmípu gyɔpɔsu ání ndin nwɔlótáasu tsú ɔsúsó nebá.”

⁶³ Bulu igyí ɔhapú dehen amu lékitá mu atadie bálí mó kiaan.* Múú ɔleblí ɔbéé, “Adánsie mɔmu anitráa anigyó? ⁶⁴Mlilanú abususu ání alablí. Nkálí gyí mlí agywun?”

Amó fée botsulá ání olegyi pón, bɔmóo mu.

⁶⁵ Amótó aku bɔwa atsonó tutúu wólí mu bi. Bɔpu ató tin mu ansibi, bɔfolí mu atswé, bláa mu bee, “Bulu ɔnósó ɔtáípu, suna aní ɔhá ání ɔlɔfolí fó itswé!” Inu agyópu amu é bedadáa mu asoto.

[§] **14:55** Yudafo asón agyípu anfi bɔtetí Sanhedrin Griiki ɔblító.

* **14:63** Ilosuná ání asón ámu lawíé mu iwíto dubi.

Petro Lóswú Ọbée Mmemyín Yesu
(*Mateo 26:69-75; Luka 22:56-62; Yohane 18:15-18, 25-27*)

⁶⁶ Petro lési otsie wunsínésó ɪnu, Bulu igyí ahapó dɛhɛn amu osúmbi tsíhé ɔkɔ léba. ⁶⁷ Bréá olowun Petro tsie ɔde ogyá núu a, ɔlekɪ mu díín. Múú ɔlefíté Petro ɔbée, “Fúa Yesu Nasaretyin amu nyɔ ná.”

⁶⁸ Táme Petro lóswú blí ɔbée, “Mmemyín tɔtɔ tsú asón ánfɪ fudɛblí ánfɪ ɪwɪ!” Ọlenatí yélu ɔkpa ɔnó, ɪnu batɛ lóɓɔn.†

⁶⁹ Osúmbi tsíhé ámu létrá yótɔ mu ɪnu, ɔlɔwa ahá ámúú ɓulú ɪnu ámu bláa bi ɔbée, “Amótó ɔkɔle gyí oyin ánfɪ.” ⁷⁰ Táme Petro létrá swú pú ɪbi wá ogyá.

ɪlɔɓwɛ kpalobí á, ahá ámúú ɓulú ɪnu ámu bebláa Petro bɛɛ, “Lélé mú á, amótó ɔkɔle fɔgyi, tsúfé Galileayin fú é fɔgyi?”

⁷¹ ɪnu Petro lówa ntam kakáa bi ɔbée, “Neká tógyító, mmemyín oyin ánfɪ mlídé mu ɪwɪ asón blí ánfɪ.”

⁷² ɪnu batɛ lóɓɔn otse nyɔɔsi. Múú Petro lékaín asón ámúú Yesu lébláa mu ɔbée, “Fóswú tse sa fɛɛ fɔmemyín mí asa batɛ ɔbéle ɔnó tse nyɔ.” ámuɔɔ. Múú ɔlekpa isú yi, híé sú woo.

15

Yesu Pilato Ansító Lú
(*Mateo 27:1-2, 11-14; Luka 23:1-5; Yohane 18:28-38*)

¹ Ọyi kehe nyankɪ-nyankɪ a, Yudafɔ ahandɛ-ahandɛ amu féé befia kítá agywun. Aku ɓɔgyi, Bulu igyí ahapó dɛhɛn, Mose mbla asunápú pú Yudafɔ

† **14:68** ɪnu batɛ lóɓɔn ima nwóló dada amu akɔtɔ.

ahande atráhe* . Inu beha beklí Yesu, pú mu yówa Pilato ibitá. ² Pilato léfité Yesu óbée, “Fúgyí Yudafá owíe amu ni?”

Yesu léle mú ónó óbée, “Ee, mó fablí á!”

³ Inu igyí ahapó dehen amu beka asón tsatsótsó dínká Yesusu. ⁴ Mú su Pilato léfité Yesu óbée, “Kí asón tsatsótsóá baká dínká fúsú, fuma mú ónó lé?”

⁵ Táme Yesu mele asvansu ónó. Mu su úlwa Pilato wánwan.

Yesu Lowu Ipón Ha

(Mateo 27:15-26; Luka 23:13-25; Yohane 18:39-19:16)

⁶ Katsun Nke kugyíkoto á, igyi ómású ogyíró Pilato amándíe ání obési obu adipútó okuléá amú onutó búdeklé há amú. ⁷ Oyin okvá botetí mu Baraba mva mu aba buda obu ali bré ámutá. Bókusú líi ómású, kpokiti léda, bómá óha mútá. ⁸ Ódám amúú bọyọ Pilato wá yóbwií ipa há mu bee, osii obu ódipú okule ha amú ali ámúú otetsiá bwé há amú ámu. ⁹ Múú Pilato léfité amú óbée, “Mlídéklé mlíaa, nsíi Yudafá Owíe anfi ha mli lóó?” ¹⁰ Ólefíté amú ali, tsúfée olowun ání Yesu iwí olu só Bulu igyí ahapó dehen amu bakítá mu ba mu.

¹¹ Igyí ahapó dehen amu beha ódám amu ónó bee, bukókoli Pilato, osi Baraba mboun ha amú. ¹² Pilato létrá fité amú óbée, “Ntó mbwéee óhá ámúú mlídéti mlíaa, Yudafá Owíe amu?”

¹³ Inu amú fée bósorá okitikíti bee, “Da mu manta oyikpalíhesu!”

¹⁴ Pilato léfité amú óbée, “Tsitsa mómuv alabwé?”

Táme belasorá okitikíti kóklókúú bee “Da mu manta oyikpalíhesu!”

* **15:1** Ahande atráhe anfi botetí Sanhedrin Griiki óblítá.

15 Pilato dékléá ðbóbwε ððm amv apé há amó. Mó sv olesi Baraba há amó, ðleha mv isá akòpú bepití Yesu mpli, ðòpυ mv wá amó ibitò ðbéε, buyéda mv manta oyikpalíhesv.

*Yesu Ahinlá Bwε
(Mateo 27:27-31; Yohane 19:2-3)*

16 Isá akòpú ámv bekpa Yesu ya ðmású ogyípú amv wóyító. Bεti amó aba isá akòpú atráhe amv féeé, beda Yesu ðbvn. 17 Bòpυ ligá pεpe kv wá mv, bòlv obungyo-awu, bwé mó owíepa bun mv nwun. 18 Inu bóbwε mv ahinlá, bεti mv bεε, “Yudafò Owíε, fó nkpasv ðnlinsv!” Bòtswι opé! 19 Inu bòpυ oyí sísi mv nwuntò, tutúu atsvnó wólí mv, dá akpawunu mv ansító. 20 Bóbwε mv ahinlá tá á, bòwóí amó ligá pεpe amv, yínkíá mv onutó atadiε wá mv, bekpa mv dálí beyéda mv mántá oyikpalíhesv.

*Yesu Da Mántá Oyikpalíhesv
(Mateo 27:32-44; Luka 23:26-43; Yohane 19:17-27)*

21 Bεfia Kireneyin ðkvá butetí mv Simon, ogyi Aleksandro mva Rufo ðsí. Otsú abú así ðbá, beka mv híé bεε, ðsóra oyikpalíhe amv. 22 Múv bekpa Yesu ya ðtinekvá butetí inv Golgota. Mó así gyí, “Nwun Okokobi Otsiákpá.” 23 Bòpυ afá kvá itεba iwíwsvn así wá ntátó tin Yesu ðnó bεε onúu, táme omonu. 24 Beda mv mántá oyikpalíhe amvsv tá á, beye mv atadiεtò. Inu bòtswι abi púki ðhagyíðha ogyíkpá. 25 Ibóbwε fé nyanki dokwebátó beda mv mántá oyikpalíhesv. 26 Múv bòwanlín tóá svá bυde mv da mántá oyikpalíhe amvsv dínká mv awunso bεε, “YUDAFÒ OWÍE.” 27-28 Beda awikplu abanyó

aku é mántá nyikpalíhesu tsía motò. Okole bu mu gyɔpɪsu, okole é bu mu binasu.†

²⁹ Inu atsónpu bəkpəkɔpú nwuntə, blí mu iwɪ abususu bɛɛ, “Yéé fú fɛɛ, fétalí bwíé Bulu ɔtswékpa amu, lápɔwé mu nkensá owító ní? ³⁰ Hə fú iwɪ, afokpli tsu oyí ámusu aki!”

³¹ Bulu igyí ahapó dehen pú Mose mbla asunápó amu é bəbɔwɛ mu ahinlá bɛɛ, “Olohə ahá nkpa, táme ɔmetalí hə mu iwɪ. ³² Ní mu gyí Israelfə owíé, Kristo, (ɔhá amóú Bulu léda mu ofúli) a, ɔkplí tsu oyí ámusu awun, ahə mu gyí!”

Ahá amóú bɛda mántá oyísó mu gyɔpɪsu múa binasu ámu é bəbɔwɛ mu ahinlá.

Yesu Lowu

(Mateo 27:45-56; Luka 23:44-49; Yohane 19:28-30)

³³ Bréá dóduanyə lɛda á, owí lɛta ɔsulúv amusu féé alu yǫfɔn ntópɔwɛ dəsətə. ³⁴ Dəsa ámutə a, Yesu lókplɔn kóklókúú, blí ɔbéɛ, “Eloi, Eloi, Lama Sabaktani?” Mú asɪ gyí, “Mí Bulu, mí Bulu, ntogyi só fakpá mí ɔma?”

³⁵ Ahá amóú bulí inu ámutə aku bonu asón áñfi, bɛblí bɛɛ, “Mlɪnu, ɔde Elia kpolí.” ³⁶ Inu amótó ɔku lésrí tsú ɔsapə, púdá ntá ɔdáitə, poyi oyísó, tsú mú fúa pótin mu ɔnə ɔbéɛ, onúu. Múú ɔleblí ɔbéɛ, “Mlilu aki bɛɛ, Elia ɔbéba bɛsɪɛí mu lé oyí ámusu?”

³⁷ Inu Yesu lókplɔn kóklókúú, ɔlele ɔhɛ.

³⁸ Inunu Bulu lébalí tatiá bəpəká ɔtswékpa obu ámutə anyə, tsú awunso beyi asɪ. ³⁹ Bréá isá akəpú ɔhandɛá ɔlí Yesu ansító ɔdekí lówun alíá Yesu léle

† **15:27-28** Mótó yéé 28 bu nwuló dada amu akotə: Inu léha Bulu asón amóú bəwanlín tswi amu léba mótó. Asón ámu gyí, “Bɛkla mu wá lakpan abwɛpótó.”

ἠἔ tráhe a, ἄleblí ἄbée “Lélé, Bulu mu Bi oyin ánfí gyí!”

⁴⁰ Atsi aku é bulí ifóntó budekí sí sí. Amótó aku gyí, Magdalayintse Maria, Salome pú Maria ání ḗḗkwí Yakobo muva mu gyama Yosef. ⁴¹ Amó é betsiá buo Yesu, tsíá kí musu bréá ḗbu Galilea. Atsi tsátsátsá akvá bobuo mu ba Yerusalem é bubu mu.

Yesu Pulá

(Mateo 27:57-61; Luka 23:50-56; Yohane 19:38-42)

⁴² Eke ámu igyi ekeá Yudafó butópólá iwí asa butegyí amó ḗkpónú ḗdaké. Bréá owí deḗḗn a, ⁴³ Arimateayin Yosef lówa iklon yó Pilato wá yókwí mu ḗbée, osíi Yesu fúli ha mu amopula. Yudafó asón ogyíḗ ogyi, butobú mu. Mu é ḗde Bulu iwíegyí ámu ḗkpa kí. ⁴⁴ Ilówa Pilato wánwan ání Yesu lawúna wu. Mú su ḗletí mu isá akḗpú ḗhande, fité mu ní olowu ilawá ḗpá. ⁴⁵ Bréá isá akḗpú ḗhande amu lótsulá mósú á, Pilato lési fúli amu há Yosef. ⁴⁶ Múy Yosef lóhḗ ḗhráda, ḗḗyḗ yésíeí Yesu lé oyí ámusu, kíklí mu wá ḗhráda ámutó, tsú mu yópulá ḗbó kwá beḗda butátó, olemináa ibwí yíléyílé ku tin ḗbó ámu ḗnó. ⁴⁷ Magdalayintse Maria muva Yosef mu yin Maria bowun Yesu opulákpá.

16

Yesu Kvsó Tsú Afúlitó

(Mateo 28:1-8; Luka 24:1-12; Yohane 20:1-10)

¹ Yudafó ḗkpónú ḗdaké ámu ilótsun a, Magdalayintse Maria muva Yakobo mu yin Maria pú Salome bḗhḗ ofobí fánfán ku bee, beyékpá Yesu fúli amu. ² Kwasieda nyanki, bréá owí lopwié a, bḗyḗ Yesu opulákpá mu. ³ Bréá buna ḗkpató á, amó wolewole

bude aba fité bee, “Ma abénya obémináa ibwi ámu lé obó ámu onó há aní?” ⁴ Botsu ansí ki a, bamína ibwi ámu lé obó ámu onó dodo. Ibwi ámu léhie móní. ⁵ Bréá bebitíwíé obó ámutɔ á, bowun ání oyasubi oku lówa ligá futútúútú, otsie obó ámu gyɔpisu. Ifú lekítá amó.

⁶ Oyasubi ámu lébláa amó obéee, “Mlímánya ifú. Nawun ání Yesu Nasaretyin amóú beda mántá oyikpalíhesu ámu mlidédunká. Bulu lakúsúa mu, oma nfi. Mlíki otíné amóú bopulá mu amu. ⁷ Mliyεbláa mu akasípó amu pú Petro mlíaa, alagya mli nkpá oyó Galilea omátó. Inú mlówun mu fé ali amóú oεbláa mli ámu ni.”

⁸ Inu besrí dali obó ámutɔ, tsúfé opúni letsii amó, onó é lobwie amó. Mú su bréá bɔyɔ á, bumεbláa ohaa, tsúfé ifú de amó, budekprínkí kpakpakpakpa.

*Yesu Iwíɔwanε Súná Magdalayintse Maria
(Mateo 28:9-10; Yohane 20:11-18)*

⁹ [Kwasieda bake, bréá Yesu lókusú tsú afúlitɔ á, olegyankpá lé iwíɔwan súná Magdalayintse Maria amóú olegya oηe laláhe asienó lé mutɔ ámu. ¹⁰ Mu é oleyébláa Yesu abúopu amóú bude mu sú, bude awirehɔ gyí amu. ¹¹ Táme bréá oεbláa amó obéee, Yesu lakúsú, mawun mu a, bumohogyi.

*Yesu Iwíɔwanε Súná Mu Abúopu Abanyó
(Luka 24:13-35)*

¹² Inu oma a, Yesu léle iwíɔwan okpa bámbású súná mu abúopu abanyó bréá buna bɔyó akuda, táme buməkəsí bí mu. ¹³ Amó é beyinkí yébláa atráhe amu, táme amó é bumohogyi.

Yesu Iwiowanε Súná Mv Akasípó
(Mateo 28:16-20; Luka 24:36-49; Yohane 20:19-23; Gyumagyihe 1:6-8)

¹⁴ Iní fée oma a, Yesu léle iwí owan súná mu akasípó dúokun ámu bréá bude ató gyí. Amó klontə-odwin pú amó máhogyi su ələwa iyin wá amó. Tsúfé buməhə ahá amó bowun mu mu kusú tsú afúlitə oma amu gyi. ¹⁵ Múú əlebláa amó əbéε, “Mliyə əyítə fée, amliyeda Bulu asun wankláán ámu əkan ha ahá fée. ¹⁶ Əha ání olohogyi, bəbə mu asú á, Bulu əbəhə mu nkpa, táme əhá ání omohogyi obégyi pón. ¹⁷ Osúna anfi obóbuo ahá ání bohogyi ni. Bégya əye laláhe mí idátə, bébli əbli bəmbá, ¹⁸ békítá awə ibitə, bónu afá ání itəmó kugyíku, táme iməəwε amó tətə. Bópu ibi dínká aləpusu, iwí bəwa amó ənlín.”

Yesu Əsósú Yə
(Luka 24:50-53; Gyumagyihe 1:9-11)

¹⁹ Bréá aní Wíe Yesu lébláa amó asún tá á, Bulu lótsu mu ya əsósú, oleyétsiá mu gyəpísu. ²⁰ Mu akasípó amu befi ası bude asún ámu əkan da ətínegyíətíne. Anı Wíe Yesu lélí amó oma bəyo agyómá. Ələtsun osúna ání bəwεsu, wá asún ámu əwunlín.]*

* **16:20** Mótó yée 9-20 ima nwóló dada amu akoto.

Bulu ntam pɔpwɛ; Nkonya
New Testament in Nkonya (GH:nko:Nkonya)

copyright © 2010 Wycliffe Bible Translators, Inc.

Language: (Nkonya)

Translation by: Wycliffe Bible Translators, Inc.

Nkonya

nko

Ghana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nkonya

© 2010, Wycliffe Bible Translators, Inc. All rights reserved.

2014-05-01

PDF generated using Haiola and XeLaTeX on 21 Feb 2024 from source files dated 29 Jan 2022

2c5882f1-9b2d-5f5e-bf4f-7030fc58727b